

## KOPI MO FAASAOSAOGA TALAFEAGAI A SUI USUFONO

*ASO FARAILE, 26 IANUARI 2018*

*Na nofoia le Nofoa e le Sui Fofoga Fetalai i le itula e 9:00 i le taeao.*

Tatalo.

### SAUNOAGA FAAFEILOAI A LE SUI FOFOGA FETALAI

**SUI FOFOGA FETALAI:** Ou te faasilasila atu ua toe amataliaina nei Taulumaga a le Fono Aoaofa Fautulafono.

A o le taeao usu o le taeao ua totoa, o le taeao ua manino foi, aua o lele ua muaa ma Tumua ae muliau Masealii le silasila ma le maimoa i lona matagofie o le Atua. O lele ua malagamaalii ma ua aliitia ai le Maota i Tiafau tauave nei i le alofa ma le agalelei o si o tatou Matai sili i le lagi.

E avea ia lenei avanoa ou te faafeiloai ma faatalofa atu i le paia o le Maota, le toaiga o upufai o Faigamalo, le afio o lau Afioga i le Taitai o le Maota, lau Afioga i le Palemia, Sui Palemia ma le aiga Kapeneta, Sui Minisita o lena itu o le malu, malo soifua, malo foi le folau. E faapena ona ofo alofa atu ma faatalofa atu i lea itu o le malu, lau Afioga i Taitaifono o Komiti Faa-Palemene, le paia maualuga o sui usufono mamalu uma na filifilia mai itumalo taitasi, ia malo malaga, malo le tauatai, malo le soifua maua.

E faafeiloai atu foi i le paia maualuga o Faauluuluga o Matagaluga a le Malo ae faapea foi Faalapotopotoga Tumaoti, ia malo le tauatai, malo le usupo. E faapea foi le paia maualuga i le faafofoga mai a Samoa i la outou tapuaiga, ia ua afe atu le faatalofa i lenei taeao, malo le onosai, malo le soifua. Ia tapuai maia, o le a alo lau Palemene i galuga o lenei aso e pei ona atofaina.

### TUUIINA ATU O PEPA

*Na tolaulau e le Failautusi le P.P. 2017/2018 Nu.148, Lipoti Faaletausaga a le Auaunaga Faa-Soifua Maloloina 2014-2015 ma le P.P. 2017/2018 Nu.149, Lipoti Faaletausaga a le Auaunaga Faa-Soifua Maloloina 2015/2016 e tusa ai ma le T.T.49.*

**TULAFONO TAU FAAOFI O TEUTEUGA O LE TULAFONO O  
AUAUNAGA FAA-SOIFUA MALOLOINA A LE ATUNUU 2018  
– faitauga faalua**

**SUI FOFOGA FETALAI:** Talu ai ua taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu loa le Fono Aoao mo le faitauga faalua o le Tulafono Tau Faaofi.

Tulai mai lau Afioga i le Minisita mo le Soifua Maloloina.

**Afioga Hon TUITAMA TALALELEI TUITAMA (Minisita mo le Soifua Maloloina):** Lau Afioga i le Fofoga Fetalai ma le mamalu o le Fono Aoao Faitulafono o Samoa i ona sui usufono filifilia, ia ua faafofoga le Atua e tusa ai ma le taulaga molia, faafetai mo le taulaga osi i lau Afioga i le Fofoga Fetalai. O lea ua e le manu, ua logo le vateatea, ua tu foi le vaga i le figota ae olioli livaliva, o le tatou faanonogamanu ua i luma lea o le Silililiese. Ia a taulutaulu talia a tatou talosaga, ia to ni manu aua le tatou faamoemoe i lenei aso. E momoli atu ai le faafetai i le agalelei ma le maualuga o le alofa o le Atua i lau Afioga i le Taitai o le Malo e faapea foi sui usufono mamalu o lenei Palemene.

Ae ua ou tulai atu lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Auaunaga Faa-Soifua Maloloina a le Atunuu 2018 i lona faitauga faalua ma ou te fia tautala faamalamalama i ai*

*Faalua e le Minisita mo Galuega, Felauaiga ma Atinae Esee, Minisita mo Tagata Tafafao Maimoa Mai Fafu, Minisita mo Faatoaga, Vaomatua ma Faigafaiva ma le Minisita mo Pisinisi, Alamanuia ma Leipa.*

**Afioga Hon TUITAMA TALALELEI TUITAMA:** Lau Afioga i le Fofoga Fetalai, o sina faamalamalama puupuu e puupuu lava e na o le lua lava Fuaiupu ia o lo o fai ai suiga lea, o lona agaga atoa ina ia mafai ai ona faagasolo ma amatalia le faamoemoe. E pei ona ua agiga i lenei Maota faapea foi i le mamalu o le atunuu mo le toe tuufaatasia o le Auaunaga Faa-Soifua Maloloina ia faapea foi le Pulega ina ia tasi e toe tasi ai le Matagaluega e pei ona sa i ai i le sefulu tausaga talu ai.

**1.0 Sini ma mafuaaga**

- 1.1 Ua taumafai le Tulafono Tau Faaofi e teuteu le Tulafono o Auaunaga Faa-Soifua Maloloina a le Atunuu 2014, (o Tulafono Autuö), ina ia aloaia ai le laasaga muamua o le tuufaatasiga o Auaunaga Faa-Soifua Maloloina a le Atunuu ma le Matagaluega o le Soifua Maloloina, ma mo faamoemoega e fesootai i ai.
- 1.2 O sini nei o le Tulafono Tau Faaofi:
  - (a) ia teuteu o aiaiga o le Tulafono Autu ia e faavae ai le faatulagaina o sui auai e aofia ai le Komiti Faatino, ina ia faavae ai se Komiti Faatino e atagia ai le tuufaatasiga o Auaunaga Faa-Soifua Maloloina a le Atunuu (o NHSö) ma le Matagaluega o le Soifua Maloloina (o MOHö);
  - (b) ia tuuina atu i le Kapeneta le pule aoao e tofia ai so o se tasi lava sui auai i le Komiti Faatino;

- (c) ia aveesea le õtulaga l agavaaõ o se tagata o faafaigaluegaina i le Auaunaga Faa-Soifua maloloina a le Atunuu (NHS) mo le tofiga o le avea ai ma se faatonu o le Komiti Faatino;
- (d) ia tuuina atu ai foi le pule faataga i le Komiti Faatino o Faatonu e tofia ai se failautusi po o failautusi e galulue faatasi mai ona sui auai.

Lau Afioga i le Fofoga Fetalai, i le faamoemoe la o lenei Tulafono i lona Fuaiupu 1: ua aiaia ai mo le igoa puupuu ma le amataga.

Fuaiupu e 2: ua teuteu ai le Fuaiupu 6(1) o le Tulafono Autu, e ala i le faaofiina o se parakalafa laitiiti (h) fou. O le parakalafa laitiiti (h), o se aiaiga lautele lea e tuuina atu ai i le Kapeneta le malosiaga aoao e faia ai ia tofiga, e tofia ai so o se tasi lava sui auai o le komiti faatino mo le famaemoe o le tuufaatasiga.

O le a faapea foi ona soloia e lenei fuaiupu, le fuaiupu 6(4), o le Tulafono Autu. O le aveesea o le fuaiupu 6(4), o le a avanoa ai se tagata o faafaigaluegaina e le Auaunaga Faa-Soifua Maloloina a le Atunuu mo le tofiaina e avea o se sui auai o le Komiti Faatino.

Ma lona vaega mulimuli;

Fuaiupu e 3: ua teuteuina ma suia ai le fuaiupu 8(7) o le Tulafono Autu. O lenei fuaiupu o le a tuuina atu ai le pule faataga i le Taitaifono o le Komiti Faatino e tofia ai se failautusi po o failautusi e galulue faatasi, o i latou ia e mafai ona auai i felafolafoaiga o se mataupu pe afai e faatagaina e le Komiti Faatino, ae leai se aia tatau e palota ai.

Lau Afioga i le Fofoga Fetalai ma le mamalu o lenei Maota, ia o si tamai teuteuga lea i le Tulafono Autu 2014, o lea ua tuuina atu mo se finagalo o lenei Palemene. Ma le faaaloalo tele.

**SUI FOFOGA FETALAI:** Faamalo saunoa faamalamalama i lau Afioga i le Minisita o le Soifua Maloloina. E manatu foi le Nofoa, ua manino mea uma toe puupuu. O le mea la lea ailoga e tele a tatou felafolafoaiga.

E tusa ai ma tatou Tulafono Tumau, e tuuina atu ai le avanoa i sui usufono mamalu o le Maota mo finagalo faaalua e tusa ai o le suiga o le Tulafono ma teuteuga e pei ona saunoa faamalamalama le Afioga i le Minisita o le Soifua Maloloina.

O lea ua tuu atu le avanoa, ou te tapa lau Afioga i le sui usufono mo Salega i Sasae.

**Tofa OLO FITI AFOA VAAI (Salega Sasae):** Faafetai i lau Afioga mo le avanoa, ou te iloa foi e puupuu le faamalamalama a le Afioga i le Minisita, ia e pupuu foi nai a matou fesili ma nai a matou fautuaga.

Ou te manatu o lea ua maea ona e tapatuliata i lenei taeao i le alofa ma le agalelei o le Atua ua tatou toe mafuta fiafia i lenei taeao fou i Lona agalelei.

Ae pei ona fai atu sa matou tala e le umi. Ou te manatua lau Afioga i le Fofoga Fetalai o le tausaga e 2006 lea sa toe tuueseese ai a tatou vaega ia e lua. I lau tilotilo atu i mafuaaga ia ua aumai, ia o mafuaaga lava e tasi. E i ai la le manatu foi lea, ua ou le malamalama i se tulaga ua toe...se tulaga moni ma se tulaga tonu. O le mea lea sa i ai, ia te au lava ia e le taua le tuufaatasi ma le tuueseese, ae taua le faatinoga o galuega, o le tulaga foi lena i lou iloa i ai, o lea e le o mautu, o le faatinoga lava o galuega e ala ai ona mafua, aua o

lea ua uma ona tatou asaina mai le tuufaatasi, ia ona toe tatala lea, o lea ua tatou tuufaatasi, ia o le molimau ola lava lena, o le l maua lelei o tomai, ia tailo i ai. Ou te talitonu lava e tele tomai la e i totonu o le Matagaluega ia e lua, ae a oo loa ina faatino, o i ina tonu lava lea e i ai le lape o mea ia.

O lona lua lau Afioga i le Fofoga Fetalai, o lea ua ou tilotilo atu e fai sina tele o le galuega ma tiute o le Komiti Faafoe po o le Board. O le upu moni lau Afioga a le Fofoga Fetalai, e tatau lava ona manaia o lea ua ou vaai atu o lea o le a toe foi atu i le Kapeneta ia le filifiliga o Board Members. E manatua foi o lea e i ai ia tatou faiga faavae lea sa filifili ai ia tatou Board Members e apply, ia ona aumai sao ai lava lea o tagata e agavaa, e i ai latou tomai e latou soalaupuleina mataupu i totonu o lea Matagaluega ma lea Matagaluega. Ia te au la lau Afioga i le Minisita, se i silasila lelei i le tulaga o le tofiaina o a tatou Board Members. Ia tofi lava tagata agavaa ma malamalama lelei i totonu o tulaga o le soifua maloloina. E mafua ona ou fai atu, o le tele o Boards ia e i ai, o tou vaega foi ia sa i i....o le faamalieina o le vaega lea sa lagolagoina faigapalota, ona o o atu loa lea i totonu i i....

**SUI FOFOGA FETALAI:** Malie le sui usufono, se i tulai mai le Minisita o Pisinisi, Alamanuia ma Leipa.

**Afioga Hon Lautafi Fio Selafi Purcell (Minisita mo Pisinisi, Alamanuia ma Leipa):** E matagofie lava saunoaga a le sui usufono, a lea ua ou faalogologo atu, lea ua agai i i le mea lea o le sailiga o mea nei o Boards. Ia e manatua foi o lo o i ai faiga faavae a le Malo lea e te saunoa i ai. O lea la e i ai le Komiti Tutoatasi, le Independent Select Committee, o latou lena, e latou te tuu maia le fautuaga i le Minisita, le Minisita i le Kapeneta, i e o lo o talosaga atu, e i ai agavaa e i totonu o Matagaluega eseese a le Malo. Po o le a lava le...e pei o le tusi apply, you have to apply, ma lisi atu ia ou tomai eseese, ona silasila lea o le vaega lea i tomai o e sau ma oe, e agavaa i le faatinoga o lea Matagaluega ma lea Matagaluega a le Malo, ona aumai lea e latou. E leai lava se manatu o tagata sa lagolagoina le pati, e le faapena le faiga o le galuega a le Komiti lea, ma lou faaaloalo lau Afioga.

**SUI FOFOGA FETALAI:** Faafetai, manatu o lo o aumai pea le fautuaga i le tulaga o le faatinoga o tatou Boards, ia ae lelei ua manino foi le faamalamalamaga a le Afioga a le Minisita, saunoa le Afioga i le sui usufono o Salega Sasae.

**Tofa OLO FITI AFOA VAAI:** Faafetai. E ala la ona mafua ona avatu se lagona, ona o lea ua maoti mai le pulea e le Kapeneta o le tofiaina o le vaega lea o le soifua maloloina. O lea la e tau fesiligia ai ia le faatinoga o le galuega a le Komiti lea ua e saunoa i ai lau Afioga, ae e le afaina, pau lava le naunauga lea e i ai, e avatu ai, pe tofia mai e le Kapeneta pe tofia foi e lena Komiti, a ia tofi tagata agavaa.

E pei foi lava o i i le Soifua Maloloina, o ni fomai, o e ua i ai ia le latou silafia, aua e pei o le mea e sili ona tatou faeteete i ai, ona o le Board lea e faamoemoe i ai ia faaiuga fai a lea Matagaluega ma lea Matagaluega, o lona uiga, a le lelei ni tagata i luga i ina, e fiu lalo i i i le CEO ma le Matagaluega e avatu ni mea, a le malamalama i ai, ona faaletonu lea o latou faaiuga e fai ma

aumai i le Kapeneta. Ia e pei na o se lagona vaivai o leni itumalo e tusa ma le Tulafono faafetai tele mo le avanoa.

**SUI FOFOGA FETALAI:** Ia tuu atu le avanoa i le sui usufono mo Falealili Sisifo.

**Tofa AUMUA ISAIA LAMEKO (Falealili Sisifo):** Faafetai i leni taeao, faafetai i lau Afioga i le Fofoga Fetalai mo le avanoa. E talitonu o leni taeao ua maea ona sii le viiga ma le faafetai i le Atua i le taitaiina mai lo outou soifua ma so matou ola i le tatou Fonotaga i leni taeao.

Ou te manatu foi o lea ua taatia i lumamea le Teuteuga o le Tulafono o Auaunaga Faa-Soifua Maloloina a le Atunuu 2018. O le manatu autu o le manatu o leni taeao, e taua le ola galulue faatasi, ia maua le lotu ola fealofani o tagata, ia iloa ona auauna mo isi.

A ou tilotilo i le teuteuga leni, ae toe tomanatu i le tausaga lea sa tuueseese ai ona o faiga faavae a le Malo, faiga faavae ia tuueseese ia le faatinoga ma i latou e mataituina ma asia ona o le faa-soifua maloloina po o lelei ona faatino. O le manatu lava e tasi sa faapea ona mafaufau ai le toatele o tagata, o le taumafai foi leni ina ia...le auaunaga faa-soifua maloloina e mafai ona run e latou i luga o le faaupuga foi leni o le Business Strategy for Sustainability. O lona uiga e pili i le tele o galuega, e mafai ai ona toe faaauau ai le galuega faa-soifua maloloina.

E le se galuega la ina ia mafai ai ona maua se polofiti. O le Komiti Faafoe foi lea sa tofia i lalo o le Tulafono, na taumafai ia mafai e le falemai ona faaauau ana galuega e aunoa ma le tagi mai i le Malo mo se vaegatupe e faatino ai, ia o faiga faavae lena a le Malo sa i ai i lena vaitau. Ua oo mai foi la i leni vaitau, o lea foi ua i ai le manatu o le Malo, e toe tuufaatasi auaunaga ia e lua.

O le manatu ai o lou sui usufono lau Afioga i le Fofoga Fetalai, i auaunaga ia e lua i lou manatu, o le auaunaga faale-soifua maloloina po o le National Health Service, o i latou ia e togafitia le tele o gasegase, a o le auaunaga faa-Matagaluega o le Soifua Maloloina, o latou ia e faatinoina galuega o faiga faavae, ina ia taofia le gasegase o tagata. E pei o le faiga lena lea sa i ai, i lou la manatu, e tatau ona malosia ia le preventative ina ia aua ne i tele o tatou tagata gasegase, ina ia faapena ona taugofie ai le togafitiga. Ae a le mea lea ua tulai mai i le taimi leni? Ia o lena tou te silafia le tele o le faamai ua i ai. Atonu foi e aoga le Tulafono leni i lou manatu, o le a mafai ona toe faaola mai ai le agafesootai, komiti tumama o nuu ma afioaga, galulue faatasi ma sui o le Malo, sui o nuu, sui tamaitai, ma faapena ona faaauau le tulaga o le ola soifua maloloina o le tagata.

Ia avea foi leni avanoa e faafetai atu ai i le Komiti Faafoe talu ai, aua o le teuteuga leni, e suia atoa ai lava le auivi, ina ia mafai ona faatino le tuufaatasiga lea ua mafaufau i ai le Malo, o se tuufaatasiga e lelei. O le lelei o le tuufaatasiga lea i lou iloa, o le a faapena ona aveese ai le duplication o galuega, e pei o galuega o vaega o tupe, o le a tasi le vaega lea, o le vaega o le faafaigaluegaina o tagata, o le a tasi foi, o le vaega o le procurements, po o latou e auina mai oloa mai fafo, o le a tasi foi le vaega ae le lua e pei ona i ai i le taimi nei.

O lea e momoli atu ai le faafetai tele i le Komiti Faafoe mai tausaga e 2006 e oo mai i leni tausaga, i le Susuga i le Ofisa Sili o Pulega, o le mamalu i le

aufaigaluega i la outou tautua, i la outou tautua i le atunuu, faamalo le lotonuu. Fai mai le upu e masani ai le aufaitofa, a toe tofia se faigamalaga, ae le gafataulimaina se totogi e tau ai lo outou agalelei, o lou agalelei ma lou alofa tulai, ua o matou taliaina ma le agaga faafetai.

Faafetai le tautua i latou ua faapea ona redundancy ona e mafua i nei suiga, ia malu ave i fale i outou finagalo ua aafia, ona o faiga faavae a le Malo ua i ai. Ia lau Afioga i le Fofoga Fetalai, e avatu le lagolago a lenei itumalo e tusa ai ma le Teuteuga o le Tulafono, faafetai.

**SUI FOGO FETALAI:** Faafetai, malo saunoa tuu atu le avanoa e tulai mai ai le sui usufono o le Itumalo Tu Taulaga i Sisifo.

**Afioga FAUMUINA ASI PAULI WAYNE FONG (Itumalo Tu Taulaga Sisifo):** Faafetai lava i lau Afioga i le Fofoga o le Fono i lenei taeao, e avatu foi le faamalo i lau Afioga e tusa ma le tauaveina o le galuega, aemaise foi le vasega i Minisita, le Afioga i le Palemia i le taumafai o le galuega o lenei vaiaso, o lenei ua tatou oo i le faaiuga o le vaiaso, o lea ua latalata faaiu ia le tatou galuega sa tuu mai.

E i ai nai manatu e lua pe tolu foi lau Afioga, o le a faavave atu ona o le tulaga faanatinati o le Tulafono. O le fautuaga muamua lau Afioga i le Minisita o le Soifua Maloloina, i le tulaga lea i le vaega o fatugao, Faalapotopotoga Faavae tau Fatugao o Samoa. O lea e foliga mai e le o lavea ai i le tulaga lea, ia ae momoli atu ai le faafetai tele i lau Afioga ona o le lavea ai o le vaega lea i i, ona o le aoga o le faalapotopotoga lea i le toatele o le mamalu o le atunuu. E talitonu foi le agaga e laki a masalo lava pe tatou te oo uma lava i ai, a o le tulaga i ai, ia maua pea le maopoopo pea o le fatugao, ina aua ne i aafia i le tulaga o le soifua maloloina lea e i ai nei le faaipoipoga lea ua toe fai.

O le taua foi, ona o lea e faitau atu i le Lipoti, e i ai lava ia nai paaga ia i fafo o lo o asiasi mai ma fai ia le latou galuega tauave, po o le galuega fai fua volunteers i le faalapotopotoga lea. O le agaga ina ia tumau ai pea ia lenei faiga paaga i fafo aua ne i aafia i le tulaga i le taimi e toe tuu faatasia ai le Ofisa o le Soifua Maloloina. O le taua ia o le faiga paaga lea mo tatou, aua e le tele e leai foi se tupe e alu ai. E talitonu o lo o taumafai lava ia le faalapotopotoga o fatugao ina ia faafiafia i latou o lo o omai i fafo i tulaga lea, ae le tele se tatou seleni o alu ai. O le agaga lea ina ia faatumau ai pea ia le tutoatasi lau Afioga i le Minisita, o le tulaga lea.

O le manatu lona lua po o se fesoasoani lona lua, ona o le tele o le Matagaluega o le a i ai nei, e taatia atu i ina, pei e manaia pe a i ai se Pule Sili, ma se Pule Sili Lagolago po o se CEO ma le Deputy CEO e fesoasoani i le galuega aua o le taimi lenei, ia lea sa i ai CEO e lua, ae o lea la o le a tasi. Ae o se finagalo ina ia patino lava ia galuega a le Deputy CEO po o le Pule Lagolago ae galulue pea i latou na e ACEO mo le faagaioiga o le tulaga lea.

O le tulaga foi i ai ou te iloa o le a le afaina ai tele le auaunaga o lo o faatino, pau le agaga lea e i ai, talosia ia siitia i luga ia le auaunaga o lo o i ai nei le falemai i lo i le taimi lenei, ina ia manaia ai se autu ua mafai ai ona fai le toe tuu faatasia ia iloa e le atunuu ma tatou uma nei, ua aoga le tuu faatasia o lea ua matua tele le improve toe tele le alu i luma o le auaunaga. Ae afai ae tuu faatasi atu ae faaletonu mai, ia ona i ai foi laia o le popolega a le atunuu aemaise foi le Maota nei, o lena ua i ai ua i ina le faatuatua i lau Afioga. E

pau le tatalo, ia alofa le Atua e fesoasoani mai i lenei faaiipoipoga fou, ma ia maua ai se laasaga lelei mo le agai i luma.

E momoli atu foi le faafetai tele i lau Afioga i le Minisita, mo le tali mai foi i nai manaoga na avatu ia mo aiga ma tulaga faapena, ia e faafetai lava o lena e i ina lau Afioga, e momoli atu ai le faafetai tele, i mea foi sa tali mai ai aua foi le gasegase ma tulaga faapena.

O le taumafai atu lea i lau Afioga i le Fofoga o le Fono, se e matautia le aulelei o lau Afioga i le Nofoa, ae talosia ia maua pea le ola o le Afioga i le Fofoga Fetalai, ia maua sona malosi aua le lua galuega fai faatasi. O se manatu lea ia manuia lava le Fono, faafetai.

**SUI FOFOGA FETALAI:** Malo le saunoa i le sui usufono mamalu, o le tasi lea o sui usufono e oa manatu e tusa ma le fautuaga e pei ona tuuina mai i lenei taeao, malo le saili. O lea ua faafofoga atu ia le Afioga i le Minisita o le Soifua Maloloina, e le gata i le Kidney Foundation, ae lea ua e agai i le tulaga o le tau aumaiga o le Deputy Position i totonu o Matagaluega tetele a le Malo, e pei ona faatino e le Ofisa o Leoleo. Malo saili o fautuaga lelei aua le Malo, fai faatasi ia le tatou galuega e matagofie ai.

Ou te tapa lau Afioga i le sui usufono mamalu lau Afioga i le faipule o Palauli le Falefa.

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai i lau Afioga i le Fofoga Fetalai, faafetai foi o lea ua uma ona toto le niu i lo tatou vatapuia ma lo tatou Tama oi le lagi i le soifua laulelei i lena itu o le Maota e faapea foi i lenei itu.

E fia fai lava se faamatalaga i le tatou teuteuga i le Tulafono o lo o aumai nei. O le mea lava o lo o vaavaai i ai lou au sui usufono o le faataua o le soifua maloloina o tatou tagata.

Sa ou i ai i le Kapeneta i le taimi na fai ai le tuu eseese lenei ma o le Afioga foi i le Minisita o lo o seei mai i le Minisita o le Soifua Maloloina, sa avea ma Minisita Lagolago i le taimi lea. Ma o le taua o le faaiuga a le Kapeneta lau Afioga, ona na faataua lava le soifua maloloina i lena taimi. Na matua maeaea foi lelei le silasila a le Kapeneta i le taua o le Tulafono na ala ai ona fai ia le tuueseese ma le faamoemoe maualuga lava o le Executive, o le auala e aupito sili lea ona lelei e maua ai e o tatou tagata le auaunaga silisili ona lelei o le soifua maloloina.

O le Tulafono lea e aumai nei lau Afioga i le Fofoga Fetalai, ou te matua lagolagoina ma le agaga atoatoa ona o le itu lenei, e le o se Tulafono e faaauau pea, o le Tulafono e ad hoc lona faataatia maiga. E tusa o le transition lea e sauniuni ai tapenapenaga mo le tuufaatasiga o le auaunaga ma le Matagaluega o le Soifua Maloloina. Faafetai i le Minisita, faafetai i le Kapeneta mo le faatofalaiga.

Na pau lava le vaega e faataua i lou manatu ona o lenei Tulafono Tau Faaofi, aua ne i tuu umia le faatinoga. O lena tou te silafia e afaina loa lagona o tagata e aafia i nei tuufaatasiga, o le popolega lea lau Afioga i le Minisita, le Kapeneta, ia e fautua atu, faapuupu.

O le tulaga foi e pei ona i ai le tuufaatasiga lenei, o le aoga o le tuufaatasiga lenei, o le a mafai ai ona faanatinati faaiuga o gasegase e avatu i fafo. O lea o le a aveese le isi layer lea sa i ai e fiu ai le Minisita ma le Kapeneta e faatalitali fautuaga mo gasegase e avatu i fafo ma gasegase e tuu iinei. O le

lelei lea. O le a i ai foi tupe e faasaoina. O le faasaoina foi o nei tupe o le a mafai ai ona faasafua atu i tua e faaleleia atili ai falemai faaitumalo. A tatou taumafai e atiae falemai faaitumalo, o le a uma ai le omai o nai tagata mai nuu i tua i totonu o le taulaga, e le gata o le a faasaoina a latou tupe, a o le a faasaoina foi taimi taua o nai tagata e fai ai a latou feau pe afai e i ai ni fomai mo Falemai faa-Itumalo, pe tolu ni aso e i ai o le vaiaso, ia po o le vaiaso atoa. O lea foi sa e galue lau Afioga i le Minisita i nuu i tua, sa e alu ma lau matatao ma lau fanamemei, na ona leai lava o ni mai ia alu loa fagota. E le faapea o se tala avane ai lau tala lea, o oe na e fai mai, ia e uma loa e alu e fagota. Ia, o lona e manaia. E tusa lava pe maua se mea pe leai, ae alu pea e fagota.

O le mea la lona o lea ou te fautua atu ai, fai ia lelei ni incentives mo fomai o le a o i tua, aua afai o le a tuua lau fanau ma lou toalua i le taulaga ae e alu ese atu mo se masina po o se lua masina, e tatau ona lelei ni famanuiaga, aua o le tala lea o lea sa faapea mai le Pulega po o le Matagaluega e provide le fale ma le taavale. O mea masani ia. So o se isi lava e faatinoa se auaunaga, e tatau ona i ai se mea e nofo ai, e tatau ona i ai se taavale e fealuai ai ma faatino ai ona tiute. A o le mea e maua pe a foi mai i lona aiga. Ia o le isi mea o lona foi e te silafia, o le umi ona nonofo valavala o le tamaloa ma le fafine, e ono afaina ai foi i faaososoga o le olaga leni. O tatou e le o ni agelu. Vaai i le tele o le afaina? E le gata e physical ae mental foi, e mai ai ma le fomai i le le nonofo faatasi ma lona aiga. Faalelei, ma vaai ni teine tausisoifua e o i tua e nonofo faatasi ma le fomai, ae le na o le ave na o le fomai ae leai ni teine tausisoifua.

Lau Afioga, o le vaega lea o komiti tumama, tasi lea vaega e ese le taua ai o le toe tuufaatasiga, aemaise ai le motu i Salafai. Se soia alii tou te faatamala i le matou motu? O oe e te Lemaota i Tafua ae te le agaga lava oe i Savaii. O lea foi e i ou autafa tama Savaii o Sala ma Lautafi, ma Unasa ma Lopao. Se i vaai i le toatele o Savaii la e i o, ae leai lava ni mea o faia i Savaii. Sa ta faapea foi ita e nonofo i ina le au Savaii ia, o Sili, o Faimalotoa. Se i vaai i le toatele o le au Savaii. Ma le isi Savaii lea o Loau, ae ua ala ona ou taua mea ia, o le manaia o le Tulafono Tau Faaofi. Na pau lava lea o le mea e pei e popole ai ma maaleale, o le tau mo tagata o le a vaea. Ae aua ne i tuu umia. A o le board lea pei ona fesili atu se tasi o sui usufono mamalu, e le o se board e faapea e faaauau. E leai. Faatoa ou lauga atu lava i le mea lea pe a oo i le taimi e aumai ai le teuteuga o le Tulafono Autu. Aua o i ina, e tatau ona aumai le tatou Tulafono Autu i le Fono o Mati, ina ia mafai ai ona implement i le tuufaatasiga i le aso 1 o Iulai 2018. Ia ona tele foi lea o nisi a tatou faamatalaga, ae alofa mai e faalelei le falemai i le matou itumalo lea e tu i totonu o Satupaitea ma le falemai la e i Tuasivi, aua o Centres ia e stabilize ai mai a o faatalitali le aumaiga i le vaa pe aumai foi i le malae vaalele, aua o la e lelei le malae vaalele i Maota. O ou mama na Tuitama, ia po o Lemaota, tasi lea Lemaota taua lea e i ai. Ia o lea foi o le a tu Sala e faalavelave i lau.... Sala, o oe le isi toa o Savaii lea e i ia. Ma lou faaaloalo lava, faafetai.

**FOFOGA FETALAI:** Ia, se i maea pea le saunoaga a le sui usufono mamalu ona tuu atu lea o le avanoa i le Minisita o Tagata Tafafao Maimoa Mai.

Tulai mai lau Afioga i le Minisita.



**Afioga Hon Sala Fata Pinati (Minisita mo Tagata Tafafao Maimoa Mai):** Ou te le fia faalavelave i le saunoaga malie a lau Afioga i le sui usufono, ae ona ua e taua suafa o i matou nei mai Savaii, e moni lava e le o tino mai galuega, a o lea ua uma ona ave le talosaga, o le 12 lenei o tausaga o ave lau talosaga ina ua ou tulai mai i le tofi i le tolu lenei o au Paeaiga. O lea lava e taumafai atu e fai auala galue ma le tele o atinae, ae o matou foi, ma te faasoa lelei. E i ai le agaga foi lele e tu atu loa i le foe faapea loa, ia faamuamua loa tatou. o le agaga la lea ou te nofo ma au, ia o le a la le isi taimi e maua ai se avanoa foi, e taumafai lava e faamuamua e o lo o faapena ona aumai le latou talosaga, ae aliitai matou nei. Lau Afioga i le Fofoga Fetalai ma le paia o le faafofoga foi a le atunuu, e moni lava. A o le agaga lava lea ia matou nei i Savaii, ia faia i mea silisili aua si o tatou motu i Savaii. E ui o lea ua vaeluaina le matou itumalo, ae le tuua ai lava le galuega faatino. Faafetai.

**SUI FOFOGA FETALAI:** Faafetai. Tulai maia le sui usufono mamalu mo Anoamaa Sisifo.

**Tofa Hon LAUOFO FONOTOE NUAFESILI PIERRE LAUOFO (Anoamaa Sisifo):** Faafetai mo le avanoa lau Afioga i le Fofoga Fetalai. Faamalo foi le soifua i lenei taeao. Ou te manatu e le umi foi se manatu ona o lea ua maea ona afea e nisi o sui usufono ua maea ona sausaunoa nisi o vaega. Ou te tau manatu i tua i le vaitaimi lea o le 1990 po o le 1990s, pei o le vaitaimi lea sa tele ai lava mea ia o reforms sa taumafai i totonu o le public service. Masalo o lea e afifio mai i totonu o le Maota lenei nisi o i latou sa galulue i totonu o le Maota lenei i lena foi vaitaimi sa silafia reforms sa faaaoga i lena vaitaimi ma faagasolo mai ai. E i ai la le tulaga lea sa tulai mai aua e oo ai le Tulafono Tau Faaofi lenei i le 2006 lea sa vavaeseina ai foi le vaega lea o le MOH, pe tuueseese ai ma le NHS, aua e ese foi le Tulafono ia a le NHS. E pei la o le miti sa i ai i lena vaitaimi, o lea foi sa saunoa ai le Afioga ia Faumuina Liuga, e tasi lava le auga o reforms sa fai ina ia siitia le tulaga lelei o le auaunaga a le tatou public service. O lea foi la sa faatulai mai ai le miti lea i lena vaitau, a o Minisita Lagolago le Afioga ia Tuitama i le Matagaluega o le Soifua Maloloina. O le faamalamalamaga lava la sa aumai e le Minisita o le Soifua Maloloina i lena vaitau, o le MOH pei foi lea o le a ave uma i ai tulaga o faiga faavae, mea o policies. O i latou la na sa galulue i le tapenaina o policies e fai ma taiala foi lea o le health sector. A o le isi vaega lea o le NHS lea e i ai le maota gasegase, o le a faapitoa lava latou i tulaga o togafitiga o galuega faafomai. Ia o se miti foi sa lagolagoina e lou sui usufono, sa vaavaai foi lea faapea o se tulaga lelei lea o le a tatou o e faataunuu lea faiga. Aua o tua atu, pei ona silafia na o le tasi lava le Matagaluega sa i ai, ae le o po foi se lilo i le atunuu ma le Maota, sa tele foi faitioga i na foi vaitau i mea sa tutupu i tulaga lava o le auaunaga faa-soifua maloloina. Ona faatulai mai lea o le reform lea faapea mo le agai i luma o le a siitia ai le lelei o le auaunaga. Ona faasolo mai lea o tausaga, e pei lava o le tausaga 2013 na toe faaofi mai ai foi le isi Tulafono Tau Faaofi e le Afioga i le Minisita o le Soifua Maloloina le Afioga ia Tuitama e suia ai board sa i ai o le management board le tauga ua ou le manatua, ae sui la i le Board of Directors. O le faamoemoe la sa i ai, o le a faatumaoti loa la le vaega lea o le falemai mai le PSC o le a le toe agai latou i lalo o le Pulega a le PSC. Ia, ona i

ai foi lea o le manatu i lena vaitaimi, manaia tele le tulaga ua faatulai mai. O lea foi sa afea i se saunoaga a se tasi o sui usufono i lenei taeao le faamoemoega sa i ai ina ia mafai lava ona totogi tupe ma totogi pili, ina ia faagaioi lava e le falemai i ana tupe maua mai gasegase e autovaa atu ai i le falemai.

Ona faasolo mai ai lea o tausaga, lea foi sa i ai le isi Tulafono Toe Teuteu na aumai i le 2014 ia e oo mai i le aso, e pei ona silafia o lea foi ua toe faataoto mai le isi Tulafono Toe Teuteu e teuteu ai le vaega o le Tulafono lenei, a le faamoemoega autu ina ia tuufaatasia vaega nei e lua o le MOH ma le NHS. O le mea la lea pei ona maitauina, na mafua ona ou talanoa i le taua o le talaaga ma le faasolo maiga o reforms ia, ona e pei e foliga mai o lea ua sau sau i luma, a o lea ua tatou toe foi i tua. Afai e toe foi i tua, o le a toe siitia ai foi se isi lelei, selau pasene. E momoli atu le faamalo. Faafetai i lau Afioga i le Minisita. Na pau lava mea e maitauina, mai nei mau tausaga ma reforms e fai, e i ai lava nai faaletonu o lo o faitio mai ai le atunuu, e pei lava ona silafia i lomiga i nusipepa ma le tele o isi mea e tutupu mai. A o le tulaga lena o lea e taumafai atu ai se manatu ina ia silasila lau Afioga i le tulaga o tagata faigaluega ina ia siitia le tulaga foi o agavaa, o le quality o workers. Aua pei o le mea lea e tau vaavaai atu ai, pei na ona reform o systems, sui le system, sui le system, a o lea e tumau lava faitioga a le atunuu i le auaunaga.

A o lea foi ou te malamalama ma ou iloa e tele foi suiga fou ua faatulai mai i le taumafaiga lava a lau Afioga ma le Matagaluega ia faaleleia le auaunaga. E le faigofie la outou galuega, e malamalama foi le atunuu e le faigofie e faigata. E oo foi la i le galuega lea o le a alo atu i ai lau Afioga i le tuufaatasia o vaega ia e lua, e le faigofie.

O le Tulafono Tau Faaofi e faaiu atu ai se manatu lau Afioga i le Fofoga Fetalai, o lea e aumai teuteuga pei ona saunoa foi le Afioga i le Minisita, e tofia e le Kapeneta nisi sui i totonu o le Komiti Faafoe. O lea la e pei e maua i le sailiiliga, o le avanoa lea o lea o le a tuu ai i totonu Minisita e toatolu, ma ole board lenei o lea pei e faaupu mai o se Interim Board, lea foi sa saunoa ai lou uso a sui usufono le Afioga i le sui usufono mo Palauli le Falefa. E pei se Interim Board, a o lea o le a tofi ai i totonu Minisita e toatolu, ae ou te masalo o lau Afioga i le Minisita mo le Soifua Maloloina lea o le a avea ma Taitaifono o le Board lea. Na pau lava la matou upu, o outou mama na pe afai o le a faatino le galuega tele lea. E pau lava le mea foi lele e faamanatu atu, ia o a outou galuega a maea ona faatino, ia ona toe agai foi lea o le Kapeneta mo le faamaoniga o ni fautuaga ma iloiloina ni fautuaga o le a faapena ona tapena e le tou Board. Ia se i silasila lelei foi i lena itu.

O le vaega lea mulimuli lau Afioga e fia oo i ai se tala, aua ou te talitonu ua tataua ona maea ona tapena sa outou Terms of Reference o se tou galuega. E pau la le mea lea e fia maua atu e lou sui usufono, o le a le faamoemoe lea e i ai e toe foi i lalo o le PSC pe faaauau pea faatumaoti i le vaega lea pei ona i ai le vaega lea a le NHS i le taimi nei? O le vaega lea e fia maua ai foi se faamalamalama a lau Afioga i le Minisita, ae o lenei taeao, ia manuia le Fono, faafetai mo le avanoa lau Afioga i le Fofoga Fetalai, manuia le galuega.

**SUI FOFOGA FETALAI:** Faafetai saunoa i lau Afioga i le sui usufono, ia e faapea foi le sui usufono mamalu mai Palauli le Falefa. Ia o e foi sa nofoia

foi le nofoa, ia o fautuaga lava aua le agai manuia o le tatou galuega, o le mea lea, malo fautua.

Ou te tapa lau Afioga i le sui usufono mai Faasaleleaga Nu.1 Sisifo.

**Afioga Hon GATOLOAIFAANA AMATAGA ALESANA-GIDLOW (Faasaleleaga Nu.1 Sisifo):** Faafetai mo le avanoa i le Fofoga Fetalai ma ou te piiama foi i le faafetai ua siitia aua lo tatou vatapuia ma lo tatou Atua i le taitai manuia mai o le soifua o lau Afioga aemaise o le mamalu o le Palemene ma le faafofoga tapuai mai a Samoa i lenei taeao fou.

Ae lau Afioga i le Fofoga Fetalai ou te fia tulai e fai pea sina manatu e tusa ai ma le Teuteuga o le Tulafono o le Auaunaga Faa-Soifua Maloloina e pei ona opea foi i le Maota i lenei taeao.

E muamua lava ona faafetai i le Afioga i le Minisita amaise foi le Matagaluega e tusa ai ma fuafuaga fesuisui. E lagona lava e leai se fuafuaga a le Malo e le faatinoina e aunoa ma ni mafaufauga ma ni miti se tele o ni taimi o fetuutuunaiga e tatau ona i ai, a o le auga lava, ia lelei le auaunaga mo Samoa lautele. Aua o le Tulafono Tau Faaofi o lo o faatalatalanoaina, o le auga o le soifua maloloina o Samoa, a leai le soifua maloloina, ia ua leai foi se malosi e faatino ai lava nisi galuega e tatau ona faia e le tagata soifua. Ma e o se Tulafono taua la i le faatatau atu i ai.

E pau lava ni mea e fia oo i ai se talanoa lau Afioga i le Fofoga Fetalai. O le mea muamua lava i le vaavaai atu i le fuafuaga mo le Board po o le vaega e faafoega lea foi suiga fou o le a i ai. O lo o i ai le quorum faapea e lima ia Directors, ia ua ou nofo ma ou tilotilo, o lea o le a ova atu i le sefulu aua pei uma lava e sefulu ea e i ai i le amataga a o lea o le a ova i le sefulu pe a i ai ma isi faaopoopoga lea pei o Afioga i Minisita ia o le a i ai, e moni la i le interim, ae o se agaga o le a aua ne i laitiiti ifo i le numera o Directors ia le quorum e tatau lava ona sili atu, a faapea e sefulu tatau pe ono. E pei o se faaopoopoga lene po o se tuualalo foi e tuu atu e tusa ai ma le Tulafono Tau Faaofi.

Ae lagona e ao foi ona fai sau faamatalaga ona o au o le sa tulai mai i lene foi vaiata i le suiga leni ua toe fesui ai nei. E tulai atu sa lagona lava le fiafia o le faamoemoe, ma sa iloa foi e le o se faamoemoe sa vave ona faatino na amata mai lava i le amataga o le 2000 faatoa faatino i le 2006, ia e le o se faamoemoe sa tasi se po o mafaufau pe miti i ai sa alu ia fuafuaga a le Malo ma tulituliloa foi e tusa ai o isi reforms i isi Matagaluega.

O le mea taua lava sa ou maitauina pei foi ona saunoa nisi o sui usufono, o le tulaga lea o le tuueseeseina o se itutino e mafai ona maitauina ma fuafua atu galuega e tatau ona faatino e i latou o lo o faatinoina le galuega, o le aveesea lea o i latou e monitor ina ma i latou e faatinoina le galuega. O se tulaga lelei lene ina ia aua ai ne i toe...e monitor lava e i latou o lo o faatino le galuega a latou galuega ona e i ai le agaga foi lea ona i ai se conflict of interests ona nana ai lea o ni mea e tatau ona aumai i luma, e le gata i lea ae ia concentrate lava lea i le isi itutino i le faatinoina o faiga faavae e galulue agai i ai i latou lea o le a faatinoina galuega. Ia o se agaga lelei foi sa fuafua i lene vaiata. Ma e maitau atu o lea ua o le a toe tuufaatasia, pau lava lene o le popolega ina ia atoatoa le mataitu ma le fuafuaina lelei o galuega e faatino aua le soifua maloloina ina ia sefe le soifua maloloina o tagata Samoa, ma le agaga foi ina ia siitia i luga le tulaga o le auaunaga. O lea ua maua foi tala mai le faatalatalanoaga ua tuanai, o le a avea foi lea auala ma mea o le a siitia

ai auala o le aufaigaluega. O lou lava manatu, ou te le iloa po o fea o le a toe maua mai ai nisi fomai e siitia ai le numera o fomai pe a tuufaatasi i le taimi nei, i le taimi nei ou te le iloa po o le a le auala e toe siitia ai ia le numera o fomai i le tuufaatasiga i lo le taimi o lo o i ai nei. Ae ou te lagona o lo o i ai ni metotia i le Afioga i le Minisita ma le mamalu o le Matagaluega i ia fuafuaga, a o le mea sili ma se mea taua lena, ina ia faatoatele le aufaigaluega aua o lo o siitia le aofaiga o tagata soifua o Samoa, e le o taitai ona talafeagai ma le numera o le aufaigaluega o lo o i ai nei.

O le tulaga foi lea e fia oo pea se faamatalaga i le tulaga lea o le Public Health. Faafetai o lea o le a toe foi i le faaogaina o tatou Komiti Tumama, aua o se fautuaga foi lena sa i ai i lena vaitau sa tuu atu i le Matagaluega, pe le ao ona toe tagai i le mea sa i ai, o le o lea i tua o tamaitai asiasi komiti tausisoifua e asiasi komiti ma ave fautuaga aemaise lava i tina, ina ia soifua lelei nai fanau o lo o tuputupu ae. Ia faafetai o lea o le a toe oo i lea tulaga, aua sa tatou i ai muamua, ae ua ou le iloa nei po o se vaitau o le 19...i le 2000 na taofia ai foi lea faiga. E le iloa po o le a le mafuaaga na mafua ai, ae lagona o mea e tatou te faia i le tuanai ia e fau ai so tatou lumanai. Talosia la o ni mea lelei ia o le a tatou toe agai atu i ai aua se lumanai e sili atu aua le soifua maloloina o tagata Samoa. O le fautuaga ma le tuualalo lau Afioga aua o lea lava ua faagasolo le tatou Tulafono, e pei foi ona i ai ni atugaluga faaalua i le tulaga lava lea o e foi o le a le i ai faamanuiaga tau galuega ina ia tulituliloa ni a latou faamanuiaga, aua sa faapena foi le taimi ina ua mavaevae i foi i lena vaitau, sa vaai foi le o le a le faamanuiaina i tulaga o galuega, ae sa taumafai lava ina ia aua ne i tele ni tagata aafia, ua aumai lava le saunoaga i le faatalatalanoaga ua tuanai ma le Afioga i le Pule Sili Aoao, o le mea lea o le a i ai o le a le toatele ni e o le a aafia. E tatalo atu pea ina ia laitiiti, a faapea lava e i ai, ia tagai aua o le lumanai ma le tamaoiga foi lea o i latou o le a aafia o latou soifuaga ma latou tamaoiga foi e tusa ai ma tatou fuafuaga.

Ia lau Afioga pau lava o lea, a faapea lava na i ai ni mea lelei i le tulaga sa mavaevae ai, ia aua tatou te faatuatuanai, pei foi ona fai atu se tala, e fau lo tatou lumanai i mea sa tatou oo i ai i le tuanai. Ae manuia tele lava fuafuaga i lau Afioga i le Minisita, aemaise foi le Minisita Lagolago faapea ia le Matagaluega, ae tapuai atu pea Samoa aua se auaunaga sili atu mo lo latou soifua manuia, faafetai.

**SUI FOFOGA FETALAI:** Malo saunoa i lau Afioga i le sui usufono mamalu. Ia ua logo faa-Tutuila foi le Maota, e le o toe po se lilo, ia o fautuaga lava o lea foi sa e nofoia le nofoa o le Matagaluega e faufau ai le sa o le soifua maloloina aua le agai i luma. Malo saunoa, malo foi tautua.

Ou te tapa lau Afioga i le sui usufono mamalu mai Faasaleleaga Nu.2.

**Afioga PAU SEFO TAUMATA PAU (Faasaleleaga Nu.2):** Faafetai i lau Afioga mo le avanoa ua tuuina mai i lou nei sui usufono i lenei taeao fou i le alofa ma le agalelei o lo tatou Atua. E faatalofa atu i lena itu i le afio o le Afioga i le Tamaitai Sui Palemia, tamaitai ma alii Minisita o le Kapeneta ma le la itu o Minisita Lagolago, aemaise foi o lea itu i tamaitai ma sui usufono mamalu o le Palemene.

Ua ou tulai atu ma le agaga faaaloalo e molimoli atu se sao o lenei itumalo e uiga i le Tulafono Tau Faaofi e pei ona aumai. O lenei Tulafono o lo o aumai i lenei taeao i luga o le Laulau a Fono o se Tulafono foi e faaleai ni manatu.

Ae o suiga faapea e alagatau foi i se isi faitau, e ao foi ona tatou mafaufau i suiga i mea e silisili ona lelei. Afai o se suiga lea mo se viiga o se isi, ia ou te talitonu lava e ao ona tatou mafaufau, o se suiga e maua ai le viiga o le Atua e ala lea i le auunaga i le mamalu o le atunuu.

O le tilotilo atu i e sa...o nei suiga pei e aumai i le Komiti Faafae ona aumai lea i le Kapeneta ona faapea lea ona aumai i le Laulau a Fono a le Palemene. O e foi o lo o nofoia le Komiti Faatonu, o ni tagata foi sa galulue ai foi i totonu ma o lo o galulue ai totonu o le matafaioi lea a le soifua maloloina. E ala ona ou tulai atu lau Afioga i le Fofoga Fetalai, leaga o au lea e tulata i le falemai lea i Motootua, o lona uiga o taimi uma lava ou te asiasi i ai. E faapea foi ona ou talanoa atu i le falemai lea i Tuasivi, ana o lo o i totonu o lou itumalo, ne i pea ane lou itumalo, ai lava ou te nofonono ae le avatu ni manatu i mea ia o lo o feagai ma le Motu i Salafai.

O le tulaga o lo o i ai i le falemai lea i Motootua, o se tulaga lelei tele, faafetai i le Afioga i le Minisita, ae i ai lava nai vaega e fia avatu, ona ou te asiasi faalua i aso uma lava i le falemai, o le taeao ma ou tilotilo ma fautuaina foi le au security, se i vaavaai ane i totonu...aia o le soifuaga lava o le Samoa a o i totonu o se fale manaia lona tapenaina, ia ua le o e fesoasoani foi lele e faaeteete mo le palapala. O le isi lava e tutu lava ma fai ni uiga foi ia e tu foi lea e faapalapala, ia ona ou fesoatai lea i securities, se i silasila ane i totonu, pei lava o tatou lava lea e tupu ai ia tulaga faapea, aemaise foi e o e asiasi, ia o lavalava e le o talafeagai ma totonu o lea fale. Aua o lea fale e ea malulu mai lava i le 24 itula, o le manaia ia o lo ta asiasi i o ta lavalava lelei ona ta alu lava lea pe lua itula o fealualuai ai lava ma maua ai foi se ea malulu, atonu o i ina foi o le a maua mai ai le soifua maloloina o tagata e asiasi i le falemai. Pau lava o lea, se i silasila le Afioga i le Minisita, ona e le o lava moega ia i le falemai fou, pe mafai ona faaopopo nisi moega se 50. I o tatou fale foi ua le o toe faaogaina, ina ia taofia ai ia mai ia e manaomia se fesoasoani, ae a taunuu se mai, ona faapea lea o le vaega o foma, e avatu lau fualau lea ona e alu lea e te faatalitali mai i lou aiga, se i maua se moega. O le mea la lea lau Afioga i le Minisita, ni nai moega e talitali ai nai mai ia e kili mai le falemai, ona faapea lea ona foia ai ni mai tigaina.

O le falemai lea i Tuasivi o le lelei ia o le ea malulu, pau lava o lea i lau Afioga aua o lea o le a tuu faatasi vaega ia e lua, atonu e aoga foi ina ia tasi le tagata e faafoea lenei Matagaluega e sili ona tele, o se tagata foi e atamai ma o se tagata foi e tatau ona tuu i ai e vae mama e asiasi i o. O le falemai i Tuasivi, e talosaga atu e na o le 34 moega o lo o i ai nei, pe faamau ane e lau Afioga i le Minisita. O le tulaga foi lea o lo o i ai ia e gasegase mai Salega ma...e omai foi i i ae faapea mai se i maua se moega. Ona fesili mai ai lea i lau suesuega i ai, o lo o faatali se moega e aumai ai le mai lea i Motootua, vagana ai la ua maua se moega i Motootua, ona aumai lea o le mai lea e taoto nei i Tuasivi, ona maua lea o le moega lena e toe aumai ai le mai lea ua toe faafoi i le fale e taoto ai. E talosaga atu i lau Afioga e toe faaopopo nisi a tatou moega se 20, ina ia maua ai le fesoasoani lea i le Motu tele i Salafai. O le tele o taimi a tupu se...e faalogo i le tino ou te savalivali ai i le falemai ona maua ai lea o se moega ou te malolo ai.

O le tulaga lea i le tausiga o tagata gasegase i totonu o le falemai, ese le matagofie. E malama le taeao alu atu le malu o le taeao o le, o le vaiaiga i le 10:00 i le taeao, o le apu, moli ma isi vaega. O le 12:00 o le taumafataga, e faapena foi le vaiaiga i le 2:00 i le aoauli o le pea, e faapena foi i le

taumafataga i le itula e 7:00 i le afaifi e faapena foi o le koko araisa. E ono taumafataga o le aso, a o le tau foi e masani ona i ai i le taimi nei e \$30, o le fua faatatau lea i tulaga faapea o se tau e sili ona talafeagai. Ou te talanoa atu lau Afioga agai lea i le falemai i Tuasivi o tatou mai Salafai. Atonu o le tele lea o gasegase i Salafai, ona o le tausiga o mai ia e avatu i tua i aiga. E le talafeagai lea vaega leaga e faateleina ai le tino mai, ma o le tino mai e le mafai ona aumai mai ia iinei, ona o le faataga o ia vaega e tausia ai le tino. A avatu asiga e le talafeagai ma tulaga ono o le mai. Lau Afioga i le Minisita pe i ai se fuafuaga i lea vaega, pe mafai ona aveese le vaiaiga ia e tolu, o lo o faatino i Motootua ae avatu ia i Salafai, e faapena ona foia ai le lau mai o mai ia mai Salafai, ina ia foia ai le vaega lea o le tele. Ae ua lava Motootua na omi iinei vagana ai gasegase ua le mafai ona foia i le tatou motu i Salafai, ae aoga foi lea i le auifaatoaga aemaise fualau aina le Minisita o Faatoaga. O le avanoa foi lea o le a faatino ai ni a latou faatoaga, e faaagaga i le falemai lea i Tuasivi. O le tulaga foi o le paka, sei silasila lau Afioga i le Minisita, e leai se paka e ave i ai taavale nei a tagata o lo o faalavelave tele le paka lenei. O lea e silafia uma e sui usufono mamalu mai Salafai, e leai se paka e ave i ai taavale a aiga e avatu a latou mai, ae o lo o avanoa ia tua. Sa ou saili i ai i le la vaiaso o lo o i ai le avanoa e mafai ona tuu le mai i luma o le falemai ona ave lea i tua e paka ai taavale. Ma o lo o i ai foi le faamoemoe o le Malo...

**SUI FOFOGA FETALAI:** Ou te faamalie atu i le sui usufono mamalu o lo o saunoa. E lelei lava ona tatou malamalama i a tatou Tulafono Tumau o le Maota. O le agaga o le Tulafono e pei ona tuuina mai, o le Tulafono o le Teuteuga e pei ona aumai ai la tatou Tulafono faanatinati i lenei taeao. O le tulaga o lauga faalauaitetele, ou te faamalulu atu i le sui usufono, o lea e tu le loma ona tuuina mai foi lea o tulaga e pei ona saunoa i ai. Ae faamolemole ma le faaaloalo le sui usufono mamalu, e lelei ona agai mai le lauga i le teuteuga ole Tulafono i le tuufaatasia o le Matagaluega e pei ona aumai ai fautuaga i le taimi i isi sui usufono mamalu ua maea atu i le tulaga faanatinati. O le mea lea e fautuaina ai le sui usufono mamalu, e oo foi i le saunoaga i le tulaga uma faapena. Ae mo le taimi nei, e i ai foi avanoa i le tulaga o Iloiloga Auiliili i tulaga o Mea Taitasi. A o le agaga e fia tuuina atu, e pei ona fofola le fala i le Maota i le taimi ua sola, tulaga faanatinati i le teuteuga o le tulafono, e pei o le agaga lena. E le tau faalavelave le saunoaga e saolele, Safotulafai, o le lena. E faaaloalo tele le Nofoa, ae faamolemole tuu mai i totonu le sa. Ia saunoa.

**Afioga PAU SEFO TAUMATA PAU:** Faafetai i lau Afioga. E saolele lava lau saunoaga, o lo o fia faafofoga foi lou itumalo aua sa taumafai foi se avanoa. Ou te manatua lava le vaa o le Pikilu. Afai na e malaga mai i Salafai, e oo i le taimi sousou e faatafatafa lava i le papa i Apolima, ae o oe sa e ola lava i Tumua nei, a o ta ita na faapena lava. Afai la ua maua le vainiu lea o le avanoa lenei. Ua e silafia e faasalalau atu aif .

**SUI FOFOGA FETALAI:** Ou toe tafa lau Afioga i le sui mamalu, ioe e tele le avanoa e faafofoga ai lou itumalo i le tulafono autu lea ua aumai ma ona teuteuga e faalelei ai moega, paka o mea uma. Ae agai sao i le Teuteuga o le Tulafono. E pei o le agaga lena, o lea e tele lava le avanoa i isi mea na e

te saunoa i ai. Ae tatou agai i le Tulafono e pei ona i ai le tulaga faanatinati. Ma le faaaloalo.

**Afioga PAU SEFO TAUMATA PAU:** Faafetai. O nai faasologa lava lea o nai teuteuga o lea e avatu ai se manatu o lenei itumalo. Ae afai o lea, o le a faauma atu nai teuteuga nei e pei onaí . . . a o le manatu ua folasia i le Maota, e aofia uma ai lava i teuteuga ia ua taumafai atu.

**SUI FOFOGA FETALAI:** Faafetai.

**Afioga PAU SEFO TAUMATA PAU:** Lau Afioga i le Fofoga Fetalai. Faafetai mo le avanoa lau Afioga i le Minisita, o lena ua avatu. E manatua lava le isi Minisita ua tea atu, taatia atu, taatia atu lava i ina i ou tafatafa. Ae o lenei teuteuga ua aumai ma lenei Tulafono. E pei lava ona ou fai atu i upu tomua, afai po o le a le umi o lenei Teuteuga ma lenei Tulafono pe toe lima tausaga pe toe sefulu tausaga toe sui, ae sui lava i mea talafeagai mo se viiga o le Atua aemaise le lelei lautele o le atunuu. O le manumanuga, pe o lenei Tulafono e toe aumai ai i totonu ni tausisoifua ma ni fomai, afai e toe faaopoopo ai nisi tausisoifua o le matua 100%, afai e faapena foi ma fomai, lelei. Ia aoao maii le tulafono lea ina ia fau le tatou falemai tele, aua o le aoga lea tausisoifua o lo o fai nei, a uma loaí . E i ai le isi faletalimalo e masani ona ou alu i ai i le weekend, ou te alu foi taeao i ai. O lo o faigaluega ai ni tamaitai sa aoga faa- tausisoifua, ae ou te manatu o le Tulafono lenei ua aumai, o lea o le a ou alu i ai taeao, ia alolofa o lea ua fai le Tulafono, e toe aoao mai ai latou, aua la latou galuega fai ma le maumau o le taimi na o ai e aoga i uta. A o lea ua e aumaia le Tulafono lea, o lou ai lena e toe ao mai ai le fanau, e faaoga ai lo latou tomai, aua le tausiga o latou aiga ma tulaga faapea. Ae o fomai ia e ave i Tuasivi, toe faaopoopo ane lau Afioga i se isi fomai i Tuasivi, aemaise lava o le tausiga e lou itumalo o le falemai lea, e leoleo e lou itumalo le falemai lea. E faaavanoa nisi potu e matuai ave i ai fomai ma o latou taitoalua ma latou fanau, ina ia aua le omai e weekend mai i inei. E tai lua aso i Tuasivi ae sue atu le fomai, ae fai mai o la e i fea le fomai. O le isi vaega lau Afioga, afai o le auaunaga lea o le a i ai, se i silasila lava i mai ia e i tua i Salafai i le itu Salega, e pei a maua le mai ona ave ifo lea, e faatonu atu e fomai, aua o le fomai lea ei Tuasivi e faatonu atu ai le togafiti e fai ai le mai lea. Po o le a se isi fuafuaga i ai, pe ave se isi fomai i o, aua a faatonu atu i le po ao la sa eva, o lona uiga e faatonu atu lava i se fale o lo o eva ai le fomai. Ia fuafua lelei, afai o le suiga lea o le a i ai o le a toe faaopoopo nisi falemai i Salafai, ua ova ma le 100%.

Lau Afioga i le Fofoga Fetalai, afai o faafofoga mai lou itumalo, o lena ua outou faafofoga i le pese a lo outou sui usufono i lenei taeao. E leo lelei ae anoa, o le mea silisili o lea ua outou te faafofoga mai. A i ai se isi avanoa ou te oo atu lava i o e faai i le Sui Palemia se i e alofa ae i lou itumalo. E leai ma se taligalu o faia o le a luasefulu tausaga, ae amata mai lava i tua o lo outou aiga i Fatausi. O le mea la lea, ou te le tagisa, ou te lagolagoina le Minisita o Aoga. O la ua ou suea lava le Amepasa o Iapani na te faia lou faleaoga, e na o lou saina lava. Ae ia outou alolofa le Kapeneta, ave le Minisita i le fusuaga lea, a le alu le Minisita, ia fai sana saunoaga i totonu o le malae, ou te talitonu lava o le a tatou faanoanoa. E lagolagoina a faapea e.í Ou te manatua lava le tala a King Pola o lou uncle, a alu e tataua ona ave i

malaga faapea, le faletua o le Minisita. E tele galuega e tataua ona fai, o le tausiga o ana fualaau, o ona laei. A leai o lo o i ai lana Minisita Lagolagoí .

**SUI FOFOGA FETALAI:** E faamalulu atu i le sui usufono. Faaiuga mai loa lau saunoaga o lea ua maea lou taimi.

**Afioga PAU SEFO TAUMATA PAU:** Ou te usitai lava i le Fofoga Fetalai.

**Tofa Olo Fiti Afoa Vaai:** Lau Afioga i le Fofoga Fetalai.

**SUI FOFOGA FETALAI:** Saunoa mai le sui usufono mo Salega Sasae.

**Afioga Olo Fiti Afoa Vaai:** Ma le agaga faaaloalo, ona o le malie o le pese a le sui usufono o Safotulafai i lenei taeao. E faatu atu le lafo, *Ia faaopoopo se 15 minute a le sui usufono mamalu.*

*Faalua e le sui usufono mo Falealili Sasae.*

**SUI FOFOGA FETALAI:** Faauma mai le saunoaga.

**Afioga PAU SEFO TAUMATA PAU:** Lau Afioga o lea ua faalua le lafo.

**SUI FOFOGA FETALAI:** Faamalulu atu i le sui usufono, leaga o lea ua i ai le lafo i le Maota, o tulaga masani o la tatou Tulafono Tumau.

*E le i tuuina atu le maliaga autasi a le Maota i le lafo.*

**SUI FOFOGA FETALAI:** Faaiu mai le saunoaga a le sui usufono mamalu o Safotulafai. O la ua faafofoga mai lou itumalo i lau saunoaga manino ma lou leo matagofie

**Afioga PAU SEFO TAUMATA PAU:** Lau Afioga i le Minisita o Galuega, sou aso atoa e fai ai se ta asiasiga. Lau Afioga i le Minisita mo Tina ma Tamaitai, faaopoopo nisi tamaitai o lo o i ai lo matou nuu e taitasi pulenuu ae e leai ni sui tamaitai, o Sapapalii, Fusi ma Fuifatu. Lau Afioga i le Minisita o Tupe, fai se ta fono ou te avatua ia oe ni magavai se lua e faatumu ai le tanoa, aua o le manao o sui usufono pe tele lava se tupe a o le manao.

Lau Afioga i le Fofoga Fetalai, a o faafogafoga mai si ou itumalo, malo lava le tapuai. O le Tala o le Tupe, faamalo faafetai.

**SUI FOFOGA FETALAI:** Fai sau faafetai i le itumalo ona faamaea mai lea ua oo i lo tatou taimi malolo.

**Afioga PAU SEFO TAUMATA PAU:** Se i aumai ni tupe sei tali ai le manao o tagata nei, ua tele le manao, ae fuafua le manao i le tupe o lo o e sailia.

O le mea la lea, le tapuaiga a si ou itumalo, affio le Aiga sa Malietoa faapea foi sa Tooa, le Usoalii matua ia Mago ma le Usuifanua, o le vaa e taumua tasi e taunuu i Fuifatu, upu ia te oe Sapapalii Leilua ma le Toalima, Alalatoa ma



le Alo o Malietoa ma le Lautinalaulelei ma Tuiletufuga ma le Aigamalaie Tuilagi ma Namulauulu ma upu ia te oe Safotulafai, faamalo tapuai, faamalo le nofo tatalo. O le mea sili o lena ou te asiasi atu lava i Aso Toonai uma. O ae tatou feiloai i aso uma. E leai se mea tou te popole ai, tout e maua se ata maua le taumafai e maua lava i Fuifatu i le mea o lo o i ai le malae e toai i ai Tumua.

O le mea la lea, lau Afioga i le Fofoga Fetalai faafetai mo le avanoa. O lenei Tulafono e pei ona aumai e le Minisita, o le matua lagolagoina lava. Soifua.

**SUI FOFOGA FETALAI:** Leaga le mea leaga o le avafatafata, faafetai tele. E manatu o lea ua taunuu mai i le tatou malologa masani.

Ou te faasilasila atu o le a faataatiaese Taualumaga a le Maota mo la tatou malologa masani mo le 30 minute.

*Na faataatiaese Taualumaga a le Fono Aoaio Faitulafono mo lana malologa masani i le itula e 10:32 i le taeao ma toe faaauau i le itula e 11:24 i le taeao.*

*Na toe faaauau felafolafoaiga i luga o le faitauga faalua o le Tulafono Tau Faaofi o Teuteuga o le Tulafono o Auaunaga Faa-Soifua Maloloina a le Atunuu 2018.*

**SUI FOFOGA FETALAI:** Ou te faasilasila atu ua toe amatalia nei Taualumaga a le Fono Aoaio Faitulafono, e manatu foi ua maua se faasiliga malosi i le paia maualuga i le Maota i lenei taeao, e tusa o faaaloaloga aua galuega o lenei taeao.

E tuu ese galuega a le Palemene ua maea le saunoaga a le sui usufono mamalu mai Faasaleleaga Nu.2, e faaolioli mai le sa o le sui usufono o le Alataua i Sisifo, tapa lau Afioga i le sui usufono mamalu e saunoa.

**Afioga ALIIMALEMANU ALOFA TUUAU (Alataua Sisifo):** Faafetai mo le avanoa, talitonu lea ua matu le fau i le taliga o le sua i lenei taeao ma o le a faaauau se manatu aua le Tulafono faanatinati ma o le a faapena ona faanatinati atu se manatu. E talia le Tulafono ona o le tulaga e tataua ona faatino ai galuega aua le toe tuufaatasia o le National Health ma le Ministry. E pau lava le lagona e fia avatu i le Matagaluega ona o le tuai ona tuuina mai o le Tulafono, ona e talitonu o lea sa fuafua e tataua ona oo atu i lenei tausaga ua uma ia lea tuufaatasiga ona e pei ona saunoa nisi o sui usufono, i le aafia o lagona o tagata. Mo le agai i luma, sa leva ona tataua ona silasila i tulaga faapenei ina ia aua ne i alu ma motusia le faatinoga o lea faatasiga ona o tulaga faaletulafono e tataua ona aiaia.

A o maua le avanoa, e fia faaalua se lagona agai i le toe tuufaatasia o nei Matagaluega. O le Tulafono e tuufaatasia ai nei auaunaga, e i ai lava le talitonuga e tataua ona maioio lelei aua e talitonu o faiga faavae a le Malo na ala ai ona tuueseeseina nei Matagaluega, ina ia tuu eseese ia mea ia o policy units mai services. Ona i ai lea o se lagona, afai o lea na tuueseese ia le Public Works ma le Communications, o la e alu alu lelei na tuueseese. Na i ai lea

o se lagona faapea, o le agaga tonu lea na ala ai ona i ai ia faiga faavae lea a le Malo ina ia ia maioio matafaioi, ina ia ese latou te faatino atu le faatonutonuina po o policies, ese matafaioi o services. Afai la lea e lelei atoatoa ia isi Matagaluega lea na tuueseese e i ai le lagona pe afai o lea o le a toe tuufaatasi, a leai le agaga o le galulue faatasi ina ia tatou taunuu i le taunuuga lea e mananao ai, e uma foi le isi 10 tausaga toe fai mai e toe tuueseese. E pei o le uiga o le tala, o le drive ina o policies nei, o le Minisita, o le faatinoina, o le CEO ma le aufaigaluega. E le toe tau faailoaina lena tulaga o lea ua tatou iloa o la e i ai le tatou Sustainable Development Goals, Millenium Development Goals o lea foi e link i ai ia le tatou National Development Goals, lea la e i ai ia work plans po o galuega faatino lea e i ai ma le Tala o le Tupe. Ou te tulai lava e avatu lagona faa-Komiti Tupe.

O auunaga nei ma galuega faatino e aumai i tausaga taitasi sau ai ma le Tala o le Tupe ina ia mafai ona ausia ia National Development Goals ma link atu ai i Millenium Development Goals, o i ina tonu lava e tataua ona agai i ai auunaga a Matagaluega taitasi lea e ala ai ona faamatuu atu iai tupe.

O le popolega la, o le mea foi lea o le taotaomia faatasi uma loa la i i o services i le policy ma le auunaga i le tuufaatasiga lea, ae ui i lea, o lea ua uma ona fai le tatou Tulafono ma o le a pasia e le toe i ai la se manatu tele. Ae e pei o se lagona lea e tau avatu manu o maua le avanoa, o le i ai o se tatou faiga faavae i le tulaga nei, ina ia tusa pe toe tuufaatasi, ae ia maioio lava ia policy unit ma le services ina ia maioio foi tupe e avatu ina ne i lelei le auunaga a fomai, ae faaletonu mai ia talavai ma le administration services ma le faamamaina o falemai ma tulaga faapena.

O le agaga lena o le tulai atu aemaise le maioio o tupe, ia aua lava ne i uma ane ua toe oki atoa tatou services a le Administration lea ua manaia le faatinoina o lea auunaga e ala i talavai ia faapea le faamamaina o tatou falemai. O le tulaga lena ua tulai atu ai e faamanatu tatou faiga faavae o le faaeseese o mea ia e lua, lea la ua toe tuufaatasi ia lelei, e leai se isi mea e matou te salaese ai o le tatou tonu e fai faatasi, ae o le agaga lena pe tuueseese pe tuufaatasi a leai le agaga o le aufaigaluega ina ia galulue e faatino le policy lea ua tuu atu, e uma foi toe fai mai e tuueseese i le isi 10 tausaga lea i luma. Manuia le Fono, faafetai mo le avanoa.

**SUI FOFOGA FETALAI:** Malo le saunoa ia lea ua tulai mai le Sui Minisita mo Aoga, ia saunoa.

**Afioga ALAIASA MUAGUTUTIA MOEFAAUO MALAGAITUTOGIAI SEPULONA MOANANU:** Faafetai mo le avanoa, e fia velo foi sina aso a lenei itumalo, faafofoga mai foi le itumalo ia a o lenei Tulafono taua.

E le faaititia lava le faafetai i le Atua, ona o le pule faasoia i lo outou soifua aemaise lau Afioga i le Fofoga Fetalai ma le paia o le Maota. O le vaavaai lava ia i le Tulafono, o lea e aumai o le first phase lea ua aumai o le toe tuufaatasi. O lea sa tatou iloa uma lava le tuueseeseaga ae o lea o le a toe fai foi le isi faaipoipoga.

E ala ona fai le mea lea i lou talitonuga, ona ua faaletonu. E leai lava se fesiligia i lou mafaufau ua ala la ona toe tau fai ona o la ua i ai le faaletonu. O le mea lea ou te faafetai ai i le aumai o le mea lenei, a vave loa ona iloa le faaletonu, ona fai lea o se faiga e foia ai. Afai la o le faiga lea e foia ai, e lagolago e lenei itumalo le faamoemoe.

O le lima tausaga ono tausaga talu ai na tatou vaai ai i falemai fou, o lona uiga, e le o fale, e le o fale le mafuaaga o le faaletonu, aua sa tatou tau lalaga foi le atunuu fai mai e tatau ona faaleleia fale e lelei ai le auunaga, ae o lea la ua mautinoa, oka! tatou toetiiti lava numera tasi i le Pasefika i le tulaga o le fale.

O upu foi lava na e masani ai toeiina, e le o le fale a o le anofale. Ou te talitonu la, o i le mea lea e faaletonu ai, le auunaga lea. E tele foi ina ou vaavaai atu i le TV ua aumai masini fou ma mea uma, ae o lona uiga, o le fetuatuanaiga e pei ona saunoa ai nisi sui e tafe mai lava i le tumutumu ma sau ai loa lea. Talosia faiva o le faamoemoe lea, ina ia ausia lava le manulauti ave le auunaga lelei i o tatou tagata, ave le auunaga lelei i le sulufai mai o le mamalu o le atunuu e fia maua le soifua maloloina ma fia maua se mapusaga.

O le mea lea e taua i lo matou itumalo, e lagolagoina foi le mea lea e manaia foi pe a faaleleia mai itumalo ma falemai o lo o i ai e pei foi ona i ai foi falemai i o matou nuu ma itumalo, e fesoasoani i le galuega lea. Ua oo atu foi i le falemai ua faatumulia lava leaga e tupu lava ia faamai fou ua oo mai i lo tatou atunuu.

Na o si au fautuaga lava manaia le saunoaga a le sui usufono lea mai Safotulafai, ioe o taliga lava e fia faalogologo i le manaia o le siufofoga o le sui usufono mamalu. Ua ou faalogo e asiasi soo i le falemai, e faalua i le aso. O le mea lea ou te fautuaina ai lau Afioga i le Minisita, taatia mea ia o falemaliu, taatia i tua i Private Sector, ae alo le falemai ua na o le auunaga faafomai. Atonu o i, o le a fesoasoani ai i leni sui usufono ma le asiasi soo i le tatou falemai i le taeao ma le afiafi, aua ou te talitonu o lana asiasiga lea ia o lo o vaavaai po o ai ua tusi i luga o le laupapa le suafa, ia e faapena. Ae taatia mea tau auunaga faatino maliu i tua o le tatou private sector o lo o i ai.

Na taua foi e le sui usufono ou te alu i o i fusuaga, leai faafetai tele lava, e tele atu lou aoga iinei i Samoa i lo na mea. O le tala a le tamaloa Faleula lea e lauiloa nei, e patipati taoto le Feepo. E leai se mea o le a o ai fua, aua ou te iloaina lava o lau fautuaga i le tama fusu lea e pisa soo ai le tatou Maota, se o sina mea lava e misi palasi loa i lalo uma le fusuaga. Sau loa saini le \$12miliona sau loa e malolo. O le a le mea o le a tigaina ai fua e fai nei mea? Ia o le mea lea lau susuga i le sui usufono mamalu, ou te le fia alu. Ae lau Afioga, e matua lagolagoina leni suiga o le Tulafono Tau Faaofi ua aumai, pe afai o le auga lea, e manuia ai le soifua maloloina ma lana auunaga. Ia agalelei mai le Atua i leni aso, ia i ai pea le....

**SUI FOFOGA FETALAI:** Malie le sui usufono mamalu o saunoa se i tulai mai le sui usufono mo Faasaleleaga Nu.2.

**Afioga Pau Sefo Taumata Sefo:** Faafetai i lau Afioga i le Fofoga Fetalai. Ae ua ou tulai atu ona o lea ua taua au nei i le lauga a le sui usufono lea mo Anoamaa Sasae. Na o le pau lava lea o le sui usufono e sili lona atamai ma e lagolago i atinae faapenei. E galo ia i tatou, o le isi alagatupe lea ma le magavai o lo o tafe mai totonu o le atunuu o le valaau a le Atua e ala lea i le maliu ma le oti. Ma po o le a lava le lagi i lau Afioga i le Fofoga Fetalai, o lena lava ua i ai le tatou falemaliu, ae faafetai tele lava. Aua a fua i le seleni lea e masaa mai totonu o le atunuu e ala lea i le maliu o tuua, po o fea lava e i

ai le Samoa i le lalolagi atoa, e tagi mai lava e taofi atu le tino maliu o le latou tuua se i oo mai. A fua la i ai i le tupe lea ou te iloa nei i le maliu e tasi e omai ma tagata nei mai fafo, e \$100,000. A sefulu maliu i le vaiaso, e \$1,000,000. O lona uiga, tasi lena alagatupe tele, o le isi lena magavai tele o lo o tafe mai i le atunuu. Ae faafetai i le sui usufono, sa ou manatu lava e toe faaopoopo se isi lima minute. Ae ai lava ona pau lea o lana tapenaga.

**SUI FOFOGA FETALAI:** Ia malie le sui usufono o saunoa, e lea i o fautuaga lava mo le lelei o le faasologa i luma o le magavai lea e te feagai ma oe. Ae aua le popole fua i le Fofoga Fetalai, e oo atu i ai ua i ai se fale maliu o le Fofoga Fetalai. Aua le popole fua, ae saunoa lau Susuga i le Sui Minisita.

**Afioga ALAIASA MUAGUTUTIA MOEFAAUO MALAGAITUTOGIAI SEPULONA MOANANU:** Faafetai lava i lau Afioga mo le faauilavea. E leai o manatu e avatu, o manatu lava e lafo atu i lumamea e faaleleia atili ai le auaunaga. Ae o lea ua ou maua o lo o i ai se tama foi o lenei itumalo ua faailagi le folauga. Avea lenei avanoa ou te faamaise atu ai i le tina ma le aiga alii o le Susuga ia Selelimalelei, ia manuia lau malaga i le lagi.

Ae faafetai tele mo le avanoa, manuia lau Afioga i le Fofoga Fetalai, manuia foi lenei Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielega (Palemia):** Lau Afioga i le Fofoga Fetalai, e pei o le avanoa lenei ona o au sa toesea, ae faatupu manatu le tootoo o Safotulafai. E i ai si au fesili lea e fia fai atu leaga o maua sa ma malaga i le tausaga e 1992. Sa ma malaga la e tausaili ai ma le avanoa e aumai ai le falemaliu lea ua i ai nei e faaliu efuefu. O lona uiga la o lea ua lua fale maliu mo i latou e faaliu efuefu ma latou foi e tanumia i tuugamau. A o le mea sa ou maitauina o le atinae tele o le sui usufono, pe i ai nisi ituaiga metotia e mafai ona maua e nei ituaiga faiga pisinisi e mafai ai ona faatumauina foliga o le tagata e o atu pea le aiga e matamata i ai nai lo le mea lea o le tanumia i le tuugamau po o le faaliu efuefu. E ala ona ou fesili, ona o le isi lenei sui usufono e mataala tele i auala eseese e mafai ai ona togafiti o tatou tagata ua maliliu. Na o se fesili foi lea afai lava e le talafeagai e mafai lava ona ma talanoa ai i tua.

**SUI FOFOGA FETALAI:** Se i tulai mai le sui usufono mo Faasaleleaga Nu.2. Po o se mataupu e talanoa i tua po o se mataupu e talanoa i le Maota leaga sa....

**Afioga Pau Sefo Taumata Pau:** Faafetai mo lenei avanoa, leaga e tele ni tausaga sa faalogologo foi le mamalu o le atunuu ae le gata i le atunuu i Samoa nei a o nisi o le atunuu i fafo, aua sa fuafua lenei faamoemoe... ou te faafetai i le Palemia i le manatua o le ma malaga. Sa ma malaga sa fesili mai po o le a foi sau... sa ou malaga ai i le malaga lea ae faatoa amatamata, ia... sa o ifo uma lava e o lo o faia lenei pisinisi matou fonu. Sa fesili mai pe i ai se tulaga faapea o ou mafaufau i ai. Sa ou fesili i ai i le tau, na mei lava i le tau, ae fai mai a ou taunuu i le taunuga lea, pe i ai se mauga lata mai i le taulaga. Ou fai atu, e i ai le mauga o Vaea o lo o tanu ai nei le tamaloa na malaga mai fafo. Ae fai mai ia te au, a e oo i le mauga o Vaea, fai se faiga lea o le faaliu

efuefu. A e taunuu i lena, ua atoa uma ai lenei atinae o le fale maliu. Tapena mai le fale, ave gaioiga, e iu lava i le faiga, aua e oo atu pea i ina... ia lea na taumafai ai, lea lava na faatino. E ui lava ina 20 tausaga, ae o lea lava sa i ai le taunuuga ou te fia oo i luga o le mauga ou te nofonofo ai, aua ua tanu ai nei le papalagi lea, ae tatau foi ona ou alu au i luga ou te nofonofo mai ai ma ou tilotilo mai, aua o le mauga lea o lo o tu ai le moli foi lea o le ava. Ia o la e foi la ua ou oo i luga o le mauga o Vaea aua ua ou tausinio i ai, ua taunuu ai le faamoemoe. O lo o saili nei se isi faiga fou, ma o le tulaga ua i ai, e le toe avea foi i le ogaumu, aua o le faiga lava ia o lea e popole le atunuu i le upu lea o le susunu, ia, o la e ua faafofoga mai... o le faaliu efuefu o se gagana tuusao ma le faigofie a faaliu efuefu e ioe uma i ai le tagata, ae manaia lava o lea foi e tolu tino maliu mo lenei vaiaso. A o le weekend foi e aumai ai mai Amerika Samoa i tagata atunuu foi nei mai Filipino, le ua aumai nei, tusa o le... ae i ai le isi faiga fou, masalo e oo lava i ai ae oo lava foi i le taimi i le tulaga faapena.

A o le tulaga faapea e mafai ona o atu e matamata ai ma feiloai ai, e i ai lava potu faapitoa e tai masina lava e nonofo ai le aiga, seiloga lava e malilie le aiga o le a ave i le tuugamau, pe tausaga lava, o la e ua i ai ou potu faapitoa lava e i ai tapenaga, e le toe fia o ese le fanau mai Niu Sila, e nonofo ai lava i i, aua ne i te i ua o i fafo te i ua lavea i se faamai, tupu ai lea o se faalavelave, a o la e ua ou saunia tulaga faapena.

**SUI FOFOGA FETALAI:** Masalo o lena ua tali le fesili. Malo saunoa.

**Afioga Pau Sefo Taumata Pau:** Ae aua le popole, o le taimi lava tai pei o le suiga lenei o tuufaatasiga o mea nei o Tulafono mai le falemai, e faapena lava. E oo foi i ai i lea taimi ua gafataulima ma saunia. O le tatou iuga lava lea, ua i ai foi ma moega a e manao lava e te alu atu e faanofo mai i luga, e mafai lava ona ou gaioi, o moega uma lava ia na faatamaia i le falemai, o la e ua ou toe faua lelei ina ia faanofo mai lava, e mafai ona talanoa i ai ma asiiasi i ai. A faataoto lelei lava i lalo, o aiaiga uma lava ina ia faamalie aua le atunuu ma manaoga o le atunuu.

Ia o le tali atu lea i le Afioga i le Palemia. O vailaau ma mea uma lava... Ia...O le tali atu lea ma le agaga faaaloalo.

**SUI FOFOGA FETALAI:** Faafetai, ua manino le mata o le vai i le faafofoga atu a le Palemia. Faafetai mo le faamalamalamaga.

Ia, ou te tapa lau Afioga i le sui usufono mamalu mo Aleipata Itupa i Lalo.

**Afioga TAFUA MALUELUE TAFUA (Aleipata Itupa i Lalo):** Lau Afioga i le Fofoga Fetalai ma le paia o le Palemene, faafetai mo le avanoa. Faafetai foi i le sui usufono ua tuanai atu mo le taliina o le fesili a le Palemia.

Na pau lava le agaga o lea sa folafola mai e maua lau \$1miliona i le vaiaso, ae ou te manatu o le taimi lea na alu i le tatou Palemene e faalauiloa ai lau fale maliu, pe a ma se \$100,000. Ia pe aumaia lena mea e fesoasoani ai i le paketi a le tatou Maota Fono. Ma le faaaloalo.

Ae ui i lea, lau Afioga i le Fofoga Fetalai, ua ou tulai atu ma le faaaloalo lava e fai sina manatu puupuu lava. O le tele o manatu lea ua uma ona tolaulau atu e sui usufono, e leai foi la se manatu o le a toe faaluaina finagalo ua faaalua. Na pau nai mea laiti tau ina faapoopo i saunoaga a sui usufono

aua lenei Tulafono Tau Faaofi puupuu ma le Tulafono Tau Faaofi, masalo pe na o se lima masina lona aoga pe ono masina ma le faaaloalo. O le mea muamua lava sa faalogologo ma le manino i saunoaga a nisi o sui usufono i le tulaga lea o tatou faiga faavae mo le taimi foi na vaevae ai le aualii lea e toalua ua tetea le faaipoipoga, o lea foi la o le a toe faaipoipo ia o le fesili pei ona saunoa le sui usufono tamaitai o lo o i lou itu agavale le sui usufono mo Faasaleleaga Nu.1 Sisifo, o le tonu o ananafi e fau ai nei, a o le fesili, o le tonu o talatu ananafi e fau ai afea? A o le a le tulaga, e alu i luma alu i tua le tatou vaa. E pei o le agaga lena o lea e lagona ai le faanoanoa, alu i luma sau i tua, o lea foi o le a tatou foi i le mea sa i ai. Ae pei o le mea taua pei ona saunoa se tasi o sui usufono tamaitai, le sui usufono mo Alataua Sisifo, o le faiga faavae lava a tatou lea sa i ai, ia, e sui le system, e sui le faiga faavae, o lea foi o le a sui le gaioioiga e merge faatasi vaega ia e lua, ia e tumau lava galuega.

Ua saunoa le sui usufono mo Anoamaa Sasae, e le o le fale a o le anofale. O lona uiga o lea mea, e le o le Tulafono lea e sui po o tatou suiga ia tatou te taumafai i ai po o faiga faavae, a o le auaunaga ia lelei. E pei o lou talitonuga, o le mea aupito sili lava lea ona taua o le service mo le tatou atunuu, ia aua ne i aumaia ni faitioga e aafia ai le tatou Malo aemaise o le Matagaluega i lau Afioga i le Minisita.

Faafetai foi i lou mataala i lea tulaga, o lea na tolaulau atu e le Afioga i le sui usufono mo Anoamaa Sisifo le faagasolo mai o le talaaga o le falemai ma le Tulafono Tau Faaofi lenei, sa mavaevae sa tasi, o lea ua lua, o lea ua toe tasi o lea e talosaga mo le...

Ae pei o lou atugaluga o le vaega lea i le Komiti foi lea pei se Komiti le tumau po o le Transition Board lea e i ai Minisita e toatolu. Sa ou laga foi le mataupu lea i le tatou workshop, e faamalulu atu ai i a outou Afioga sa auai, ae pei o le agaga lava lea pe o le mea ea o le a outou faia... masalo e Taitaifono lau Afioga i le Minisita o le Soifua Maloloina, lagolagosua isi Minisita pei o le Minisita o Tupe ma le Minisita o le SOEs, ona uma lea fai la outou tonu fai le lipoti e ave i le Kapeneta ona toe saofafai ai foi lea o outou. E pei na pau lava lea o se popolega i lou sui usufono, e pei e tau i ai sina conflict i le vaega lea, afai o outou o le faaiuga e ave i le Kapeneta, toe saofafai ai outou e fai le faaiuga. Ma le faaaloalo. Tulou, e le tau fesiligia lo outou agavaa, faamolemole e leai. E matua talitonu lava le agaga e taua lo outou auai, ae na pau lea o si popolega o lea e tuuina atu i a outou Afioga.

O lona lua o tautalaga, sa ou lauga ai foi, o le vaega lea i le mamalu o le atunuu lea o le a toesea e le toe galulue ai. Ia e leai, e le tau selu atu i lau Afioga i le Minisita o Tupe ma le Minisita o le Soifua Maloloina, e le taumate o le a lelei se redundancy mo nai o tatou alo ma fanau po o nai uso foi ma tuafafine o lo o galulue i le isi vaega o le soifua maloloina, ina ia lelei ni a latou pay package, aua o latou foi o nisi o alo ma fanau o le atunuu.

Ia e pei na pau lea o nai manatu e fia tuu atu i luma o lau Afioga i le Fofoga Fetalai aemaise ma le faaaloalo i le Afioga i le Minisita o le Soifua Maloloina. Ia manuia le Fono.

**SUI FOFOGA FETALAI:** Faafetai. Ou te tapa lau Afioga i le sui usufono mo Falealili Sasae.

**Afioga FUIMAONO TEO SAMUELU TEO (Falealili Sasae):** Ou te manatu o se laolao lelei lenei lau Afioga i le Fofoga Fetalai e avatu ai foi nai motugaafa aua le Tulafono Tau Faaofi o lo o taoto nei i le Maota. E faatalofa atu foi i le aoatotele i le ee papaaao o le Palemene mai lona Taitai aemaise foi o le Aiga Kapeneta ma le mamalu o sui usufono o itumalo taitasi. Ou te manatu e le auese le lagona e tusa ai o le Tulafono Tau Faaofi.

Lau Afioga i le Fofoga Fetalai sa i ai le naunautaiga i le amataga a o tulai le Afioga i le Minisita e faamalamalama le Tulafono Tau Faaofi, sa ou manatu o i e fofola mai ai vaega uma ina ia manino ia aua ne i toe i ai nisi vaega e toe lagalaga. O a ni tulaga ua lelei ma faatino, o a ni tulaga sa lelei ona faatino ma le mafuaaga ma le autu ua mafua ai se lagona e ao ona toe tuufaatasi ina ia mafai ona manino nei sui i le tulaga ua oo i ai se lagona o le Minisita, ia, ina ia mafai ona toe fai le faaipoipoga lea ua leva ona tetea. Ae manatu o lea ua aoao nai manogi e tusa ma saunoaga ma fetalaiga foi a nisi o sui usufono, ua maua ai nai manatu i lenei taeao.

E muamua ona oo atu le faafetai e tusa ai o le faagaioiga o le Komiti lea, aua e i ai le lagona o le Komiti lea sa i ai foi nai popolega, e le o se Komiti e tumau ai, its only temporary pe a tusa ai ma le faamalamalama o lenei Tulafono Tau Faaofi, o le Komiti lea o lo o i ai i totonu ma afifio ai Afioga i Minisita, na o le piriota lava lea e fai ai le tatou transition lea seia maea. Ou te le iloa la i ai pe a toe soloia ai la le nofoaga o latou Afioga i Minisita ia o le a i ai i le Komiti. O se lagona vaivai lena aua ou te talitonu, a faapea ua maea le piriota lea, ona faasee ese lea o i latou ma le Komiti aua o i latou foi ia o le a saofafai atu i le tatou management, o lona uiga o i latou foi ia e oo mai ai fautuaga. Ae ou te lagolagoina le i ai o a latou Afioga ina ia faaoga le tomai ma le faanatinati e fai ai le transition lea.

Lua o faamatalaga lau Afioga i le Fofoga Fetalai, e le na ma le laina i latou o lo o faigaluega. O le faaupuga ma le tala mai a le Ofisa Sili o Pulega o le Matagaluega, e manatu na o le toaluasefulu pe i lalo ifo i latou o le a aafia galuega. E i ai le lagona o lou sui usufono, e luasefulu pe sefululima pe i lalo o le sefulu, se i tagai ane lau Afioga i le Minisita, ona o i latou foi ia o lo o faamoemoe i ai le tausiga o aiga, aemaise foi o le faateia o i latou o le a faamutaina auaunaga, ona o le fesuiaiga lea ma le merge lea ua fai ina ia i ai ni tapenaga lelei, e faapei foi o i latou o lo o faigaluega foi ma tuuina atu ona i ai le faaiuga e pei ona fai, e pei ona aafia ai foi latou i leoleo.

E i ai le lagona ma le manatu, afai e le toe faaaogaina i latou, pe le mafai ona tagai le Minisita i nisi avanoa faigaluega i totonu lava o Ministries e mafai ona tuu atu i ai latou nei ina ia mafai ona faaauau ai pea le auaunaga. Aua e talitonu le faamoemoe, o i latou foi nei ua already ua i ai latou commitments sa fai, e le gata i le tausiga o aiga, ae ou te talitonu e i ai foi a latou nonogatupe sa fai ma le faamoemoe o le a faigaluega ai pea. Peitai, o le suiga faafuasei lea o lea o le a motusia ai le auaunaga ona motusia ai lea o le vaega lea. O le atugaluga lena i lou sui usufono a faapea o la e ua i ai se tapenaga faapena mo i latou, faafetai.

O le tasi vaega e pei ona taua foi e nisi o sui usufono, e sao, e le o le fale, a o le anofale. A o le upu moni lava o le falemai o lo o i ai nei, o le manaia ia, aua e mimita ai foi le agaga pe a malaga mai aiga mai fafo ma o latou molimauina galuega, e tulaga ese foi le tatou falemai. Ae na ona silasila lava o lau Afioga i le Minisita e tauala atu i lou avanoa lenei i le vaega lea e i ai le emergency. E lua vaiaso talu ai, sa ou alu atu ai e avatu se tasi o le fanau a o

matou i ai i totonu o le potu lea, e tolu lelei po o matou i ai e le i i ai ni moega, sa matou nonofo ai lava i autafa se i tau faatalitali se vaega e avanoa. O lona uiga e le faaitiitia le vaega lea, e faatupulaia, aemaise lava o le itu lea le emergency. E le gata la i moega, ae toe foi lava i le faafitauli lea o le lava o alii ma tamaitai fomai e faatino le galuega. E lagona lava le momomo o le loto i le alofa i si tamaitai sa tiute i lea aso, e fai o le momoe i le isi potu a o le momoe i le isi potu. Ona matou molimauina lea, ana ou iloa faatino le galuega lea o le toe revive ina mai o se isi ua taumafai e faamanava, ia e laitiiti le tino o si fomai, ua pamu pamu, vaeatu le faafofogaaga a le atunuu, ua le mafai ona tu i lalo ma pamu. Na iu lava ina oso i luga o le tagata ma pamu le tagata lea ina ia taumafai ona faamanava. Ia, sa ou alu atu ai mulimuli pe manaomia se fesoasoani aua ou te iloa ou te gafatia le galuega lea o le pamu, ae peitai, na iu lava ina maliu ai si tama lea. A o lenei Tulafono Tau Faaofi ma mea uma nei ua tatou faia, e toe foi lava i le auaunaga. Lelei le fale, lelei vaega e faatino, ae a leai nisi e faia le auaunaga, o le faafitauli tele lenei. Faamata e le auala atu ai foi i i, toe tagai ane le Afioga i le Minisita ma le tatou Malo, masalo o le ala lea e toatele ai i latou e mafuli lo latou finagalo i mea ia o private, ona fai lava lea o latou practice i tua ona o le tupe. Atonu o le isi lenei vaega. Ae momoli le faafetai tele. E le faapea o i ai se lagona foi lele e le lelei le auaunaga, ae ou te talitonu o le lava o i latou e faatinoina le galuega.

O luga i le emergency room lau Afioga i le Minisita pe afai e te tagai i ai i le taimi lenei, ia o i latou ia o lea e avatu i togafitiga faafuasei o luga i le faalo se i tulou lava, ona o se mea e tatau ona foia vave, o la e sosolo ai le limu uliuli. O lea e revive le tagata lea ae pau mai lava le limu mai luga toetiiti lava, vaeatu lava, toetiiti lava pau i luga o le mai. A o le matua leaga lava ua sosolo atoa le limu i luga o le ceiling, ou te le iloa po o se vai o liki ai lea e sosolo atoa ai, i le emergency room atoa lava. Ia, ina ne i te i ua faatupu mai ai ma auala mai ai isi faamai, a o nai vaega laiti na e tuuina atu i ou autafa lau Afioga i le Minisita. O lea ua i ai le fofo o le short o tatou moega, o lea ua saunoa le sui usufono mo Safotulafai, o lea ua uma ona ia toe kamutaina moega leaga ia na lauina atu i le falemai, ia toe faatau i ai i le falemai ina ia faatele ai moega o le falemai mo lenei taimi, se i maua ai se fesoasoani foi i se taimi o mulimuli mai.

Ia, e auala atu i lau Afioga le faafetai tele mo auaunaga, e talitonu le faamoemoe e ui lava i Matagaluega uma, a o lo o i ou aao le soifua ma le ola o le tagata. O le fatu lea o le tatou Malo o le soifua maloloina. Atonu e auala atu i lenei tautalaga le faafetai tele i lau Afioga i le Minisita, o lea ua taimua le Minisita mo Tina ma Tamaitai, Atinae o Nuu ma Afioga ma Agafesootai i le uunaiga o Komiti nei, sui o tatou nuu ia e i tua, galulue faatasi ma le Matagaluega o le Soifua Maloloina e toe uunai tatou Komiti Tumama lea ina ia mafai ona faamalositia faatasi ai ma pulenuu e toe foi lava tatou i le mea sa i ai ina ia faamamafa tatou i le mea lea o le prevention ae faaitiiti i le mea lea o le togafitiga. Ioe, e le mafai lava ona sese le upu foi lea, oE sili lava le puipuia nai lo le tau togafitia.ö

Ia, e faaiu atu ai lea ma se tautalaga lau Afioga i le Fofoga Fetalai, faamalo mo le faafoeina o le Fono. E le toe tau faafuluina lau pa, e le toe tau laeia foi le maosofia i le tofa ma le faautaga i le faafoeina o le Maota Fono. Ia maua le faautautaga aua le faafoeina o lenei Fono. Ia manuia foi le faafofoga tapuai



mai a si ou itumalo o Falealili Sasae, aemaise foi o le Palemene atoa. Soifua. Faafetai mo lou avanoa.

**SUI FOFOGA FETALAI:** Faamalo saunoa i le sui usufono mamalu mai Falealili Sasae. Ua taliga lava e fialogo le saunoaga, ae te masani ai, ua ta fia Falealili fua, e pei lava o upu masani a le atunuu. Malo tapena. Ia e maitau atu e le o toe....

Tulai mai lau Afioga i le sui usufono mo Vaimauga Sasae.

**Afioga SULAMANAIA FETAIAI TAUILILI TUIVASA (Vaimauga Sasae):** Faafetai mo le avanoa i lau Afioga i le Fofoga Fetalai. E pei ona taua foi e le sui usufono mo Falealili Sasae, e fia momoli foi le faafetai i lau Afioga i le Fofoga Fetalai mo le taitaiga o le Fono e amata mai le aso ananafi.

**SUI FOFOGA FETALAI:** Ou te toe vaelupe le saunoaga ae le i tuua i tai le sui usufono mamalu mai Vaimauga Sasae, a o fofou lou sa, ua manatu le Nofoa o lea ua tatou taunuu i le siui o le galuega i lenei vaiaso. E pei ona silafia i le tatou galuega masani, o le itula e 12:00 i le Aso Faraile e maea ai galuega a le Palemene, ia o lea ua tatou toai taunuu i ai. O le mea lea, ia o le a maua se isi avanoa i le Aso Gafua a sau nei.

E i ai le talitonuga e fia momoli le faamalo ma le faafetai i lenei aso ma lenei vaiaso i le aga atu o le paia maualuga o le Maota aua le fitaituga e filitagaga le tofa ma le faautautaga aua se agai i luma o le feau ma le galuega e pei ona valaauina ai a outou Afioga. Peitai ina ne i seetia le faatautaiga i le ata fofola o le tai sa tau faausu i le taeao, ona molia lea o se auaunaga e pei o le vasa nai le faga i le Alataua, na utu i vaoto ma le faautugasami. Ae a le galutuu pei o le faaseega nai le vasa leaga o lele ua feagai Olofaga ma Mataala i le paia o le Maota i le afio o lau Afioga i le Palemia, le Sui Palemia ma le mamalu o le Kapeneta, ae a le atuao i le tapuaiga a Afioga i Minisita ma le Lagolago.

E maualuga foi lea itu i le paia ma le mamalu o le saofaiga a sui usufono o le Palemene o tumutumu mauga na filitoa i ai le atunuu e momoli se sao aua lana tapuaiga. Malo faatoa. O le agaga faafetai o le Nofoa i le tatou galuega, e vaavaai lava ma le fiafia ua toafilemu le gasologa o Taulaumaga o le tatou auaunaga. Faafetai i la outou lagolago faatupu i le Nofoa ma le tauaveina o ona tiute e tau faatonu folau i agatonu o taualumaga o le tatou Fonotaga. Ua moni ai upu a le atunuu ua le o se malama na saia i le ata a o tupe lava na susu uu.

Lau Afioga i le Palemia ma lou auvaa, faamalo le onosai, faafetai le faapalepale. E i ai lava lou talitonuga, se ua outou masani i fita o lo outou valaauina. E molimau lava ma le agaga fiafia i taualumaga o Fonotaga o lenei vaiaso, e leai o lea lava e toa le tai ma taula i le Atua la outou faatofalaiga. Ia e faapea foi lea itu o le Maota, faamalo tapena faafetai faasoa. Ioe. O le tatou matafaioi mataitu lea o le miliina faauu o upu e momoli ai manaoga o le atunuu. O le tatou tuualalo foi lea e matimati ai le sa o le Malo ma lana Kapeneta. Tatou tapuai laia ma tatalo a o aga le Malo e saili se fuefue aua le tatou malaga i lenei tausaga.

Ia, Samoa ma lau tapuaiga i ona tafa e fia, faamalo le tapuai, faamalo le tatalo mai ua manuia faiva o lau Palemene ona o le mana o la outou tatalo ma la outou tapuaiga. Ae o le agaga vaivai, o le a se gagana ua le tautamalii i lau

faafofogaaga Samoa, matou te matua atu i ina. O le tatalo, ia foai atu i le Atua le finagalo, faamagalo, tatou lafoai ia te ia, o le Atua o manuia tatou te maua ai le manuia aua alo ma fanau mo le lumanai.

Le paia o le Palemene, ou te manatu sa siisii foi se gagana a le Nofoa i le faatautaiga o le tatou galuega, afai ua afaina se finagalo, ia alofagia ma lafo i auau o peau. O le agaga moni, ia tausia pea aiaiga o Tulafono Tumau e tausia ai le filemu i totonu o le Maota, aemaise o le tausia o tulaga mamalu ma le aloaia o le Fono Aoa Fautulafono. O le matou tatalo, ia taoto ia i le utaitesolo ma le utaitesolo, ae sagai ane ai o le tai i le alofaiva o le Malo faapea le alofaiva o Komiti Faa-Palemene i Taulumaga o galuega ua tatou feagai ai, tatou faamoemoe laia i le Atua e maua ai malo aua se ai mo le tapuaiga a Samoa.

E ia te au le agaga faaaloalo ae le i tolopoina le Fonotaga, ou te valaau atu i le Minisita Lagolago mo le Matagaluega o Faamasinoga ma Pulega tau Faamasinoga e te saunia se tatalo e faamaea ai galuega o leni vaiaso e talitali ai lena vaiaso fou i le alofa ma le agalelei o le Atua.

*Na tolopo Taulumaga a le Fono Aoa Fautulafono i le itula e 12:07 i le aoauli seia aulia le itula e 9:00 i le taeao o le Aso Gafua, 29 Ianuari 2018.*